

Ebirikukorwa omu kwegyera omuka

OKWEGA
nikubaho buri
hamwe, obwire
bwona kandi
n'okwa
buri-omwe



EENET – Enabling Education Network

PO Box 422
Hyde
Cheshire
SK14 9DT
UK

 www.eenet.org.uk

 info@eenet.org.uk

 +44 (0)7929 326 564



This work is licensed under the Creative Commons Attribution-NonCommercial-ShareAlike 4.0 International License. To view a copy of this license, visit <http://creativecommons.org/licenses/by-nc-sa/4.0/>

Omurimo ogu guhairwe orusa (laisinsi) ahansi y'enkora eya Creative Commons Attribution-Non-Commercial-ShareAlike 4.0 International License. Okureeba n'okushoma kope ya laisinsi egi, taayaayira [http://creativecommons.org/licenses/by- nc-sa/4.0/](http://creativecommons.org/licenses/by-nc-sa/4.0/)

okwanjura



Ebirimu		4	
Emirimo erikureetera abaana abaine ebyetengo by'omutaano omu by'okwega hamwe n'abaine obumuga/oburema aha mibiri yaabo baakunda, baabaasikirwa hamwe n'okumanyiira okwega		6	
Orukarara rw'emirimo		8-73	
ABC book	8	Okukora orukarara	39
Yombeka omunaara	10	Kora maapu y'ekyanga kyanyu	40
Yombeka amaremesa	11	Kora enyamaishwa omu sokisi	42
'Calcumaze' (Ekichegyere ky'ebibaro)	13	Omwesho gw'amabaare nari ogundi gwona ogurimu okubara	44
Okuteeka orikwejunisa enamba nari eshuura	16	Okureeba eby'obuhangwa bw'ensi	46
Tebeekanisa omwesho	18	Ekyeshongoro kisya, ekidongo kikuru	49
Nooreeba eki ndikureeba?	20	Ebishoronyo ebitarimu muhoho	50
Teera ekinyamaishwa eki oyeteekateekiire	21	Byara ensigo, embibo nari enjuma reero ogireebe erikukura	53
Teera orurembo oru oyeteekateekiire nari oru oraahangahangire omu mutwe gwawe	23	Okushomera hamwe	55
Ebi orikukirayo kukunda	25	Omuhiiigo gw'ebirya bitaahi byabyo	58
Zeereeza eryato ryawe aha mutwe gw'amaizi	27	Enamba y'ekihama	60
Okuza omu katare nari ekikomera	28	Enshusha/endeebeka hamwe n'entereera (nk'eyemisitaari/okwetoroora) y'ebintu	62
N'ebigambo bingahi...?	30	ebi'obuhangwa bw'ensi	
Kuri noogira ngu ndi omwebembezi mukuru ow'eihanga (Purezidenti)...	31	Ekitebyo ky'abari omu nyamuziga	64
Gaaniira n'omuntu okuzire (omukaikuru/omugurusu)	33	Yebaza emanzi y'omu kyanga kyanyu	66
Heesha, kora ekyoma nari ekikoresibwa	35	Okuhiiga eky'omuhendo	67
Okukora ebintu omu bikoresiibweho nari kasasiro	37	Ebibuuzzo makumi abiri (20)	69
		Ebaruha erikuza ow'omwegyesa waawe	71

okwanjura

Ekihandiiko eki n'eky'oha?

- Emirimo egi n'ey'**amaka goona** ag'abaana abaine hamwe n'abataine bumuga/burema aha mibiri yaabo.
- Emirimo egi n'eya **buri omwe** - baataata na baamaama (abazaire), abareeberezi, abaana, eminyeeto, enyina-emwe (banyaanyazi/barumuna/bakuru baawe), baanyakwenkuru na baashwenkuru, baashwento (baatatento)/baamaarimi na baatatenkazi/baamaawento. Hariho emigisha mungi y'okwegenya hamwe.

Emirimo egi n'eha?

Emirimo egi '**n'orujwangye**', neekorwa abaishiki n'aboojo ab'emyaka yoona hamwe n'abazaire baabo, abareeberezi hamwe n'ab'amaka gaabo, kandi neekorerwa omuka. Buri muntu weena naabaasa kwejunisa ebiteekateeka bye hamwe n'okuhangahanga kwenda kwombeka n'okwongyera kushemeza emiringo y'okwega egi. Ijuka ngu okwega nikubaho buri hamwe, obwire bwona. Emirimo erikukira obwingi neebaasa kukorwa emirundi mungi kandi omu miringo mungi.

Ahabw'enki emirimo egi yaakozirwe?

Emirimo egi neeshagika emiringo mungi ei abaana barikwegenyeramu baaba bari omuka. Emwe omuri egi ebaasa obutakubeera misya ahakuba abaana baawe baatandikire n'okugikora/batwire nibagikora. Emirimo egi neehwera amaka kwongyera kumanya n'okwetegyereza **oku okwegenya omuka kurikubaasa kukorwamu hamwe n'emiringo ei kurikureebkyeramu**, oteireho n'oku okwegenya omuka kurikubaasa kuhwera n'okushagika okwegenya ah'eishomero.

oku waakubaasa kwejunisa emirimo egi kuhwera abaana kwega?

Iwe n'omwana waawe mureebe emirimo egi hamwe. Ikiriza omwana waawe/abaana baawe kutoorana emirimo eraababoneerere/ ei baraakunde. Emirimo egi terikwetenga kukuratanisibwa omu muringo gwona.

Hariho ebirikukwata aha buri murimo hamwe n'ebiine kukorwa, nk'oku birikworekwa ahaifo:

Noija kwetenga: Akabokisi aka nikooreka okweteguura nari entebeekanisa eziine kukorwa hamwe n'ebikoresibwa ebi orikwetenga kukora omurimo ogu. Emirimo emwe terikwetengyesa bikoresibwa, endijo neeyetengyesa ekaraamu n'orupapura, nainga ebipaketi nari ebishembesho by'ebindi bintu ebikoresibwa omuka, hamwe n'ebindi ebirikubaasa kushangwa omuka kandi ebi otaine kugura.

Ekiine kukorwa: Ebiragi ebi bihandiikirwe kwenda ngu omwana abaase kubikuratira. Abaana abarikubaasa kushoma nibabaasa kukuratira amadaara nari amatembezo aga baitu abandi baana babaasa kwetenga obuhwezi bwa mukuru waabo nainga omuntu ondijjo omukuru orikumanya kushoma.

Omurimo ogwongyeirweho: Emirimo endijo eyongyeirwemu kwenda kuheereza abaana abakuruho kandi abaine okubaasikirwa okwingiho kukora ebigyezo ebihangoho.

Aha muheru gwa buri murimo hateirweho ebiraakuhwere kutoorana emirimo eshemeire omwana waawe. Ebi birimu:

Emyaka: Eki nikyoreka orwingano rw'emyaka oru buri murimo gushemeire, baitu obumwe abaana ab'emyaka yoona babaasa kukora omurimo gumwe. Ebi barikwiha omuri ogwo murimo bibaasa kugiraho entaaniso, ekyokureeberaho, abaana abakuru babaasa kuhandiika bingiho kandi bateere n'ebishushani ebishoborokire kurungiho.

Obuhwezi bw'omuntu omukuru/mukuru w'omwana: Eki nikikworeka yaaba iwe nainga mukuru w'omwana ogwo naayetenga kumuheraho kakye, kumuha obuhwezi oburinganeire nainga obwingiho; nari omwana yaaba arikubaasa kwekorera omurimo ataine kihwera. Obuhabuzi obu n'okworekyererwa oku nibija kukuhwera kucwamu yaaba oshemeire kuguma haihi baitu oine omurimo ogundi ogu orikukora obwo omwana waawe arikukora omurimo gwe ogwo. Iwe nainga mukuru w'omwana (mwene-nyina/mwene-ishe/munyaanya) ogwo nimwetenga kuheereza abaana abaine ebyetengo by'omutaano omu by'okwega hamwe n'abo abaine obumuga/oburema aha mibiri yaabo obuhwezi.

Ebi oraayege (okumanya) hamwe n'ebi oraakore/eby'okukora (emyoga): Buri murimo niguhwera omwana kwongyera aha Kumanya kwe, nainga kukora hamwe n'okwega omwoga musya. Akabokisi akari ahansi ya buri murimo nikooreka okumanya n'emyoga eri omuri ogwo murimo. Emirimo emingi erimu okukora, okwombeka nainga okuhangaho ekintu kandi eki nikihwera omwana waawe kuta omu nkora emyoga ey'omugasho. Emyoga egi erimu enkwatanisa, okukwatanisa nari okukora n'abandi, okurondera ebizibu omubazi, okuteekateeka okugyendereire kucencura enshonga kukora encwamu ehikire hamwe n'encoresa nungi y'ebicweka by'omubiri. Amashomero hamwe n'abeegyesa nibamanya ku emyoga egi eri ey'omugasho. Abaana obumwe nibaba bataine bwire burikumara kwega n'okuta omu nkora emyoga egi baaba bari ah'eishomero. Omuka hariyo emigisha mingi y'okwega kurabira omu kuzana hamwe n'okukora emirimo y'obutoosha nk'okuteeka.

Emiringo mingi y'okukora omurimo: Emirimo emingi erimu ebiteekateeko ebirikukwata aha kwemanyiiza hamwe n'okuhindura omurimo ahabw'omwana aine ebyetengo by'okwega eby'omutaano nainga obumuga/oburema aha mubiri. Emirimo yoona neebaasa kukorwa abaana boona, baitu babaasa kwetenga obuhwezi bukye kukora emwe ahari egyo nainga okwejunisa emiringo mingi y'okukora omurimo (nk'okuteera ebishushani nainga okugamba omu mwanya gw'okuhandiika, nari okworobyia omurimo ogwo). Orupapura orurikukurataho nirukuheereza ebiteekateeko aha mirimo y'okwemanyiiza nainga okuhinduraho. Noomanya omwana waawe kurungi; n'ahabw'ekyo noomanya ekiraamukorere.

Ijuka ngu okwega nikubaho buri hamwe, obwire bwona.

okuhindura emirimo ahabw'abaana abaine ebyetengo by'okwega eby'omutaano hamwe n'abo abaine obumuga/oburema aha mibiri yaabo.



Akabokisi ak'ahaifo ya buri murimo nikooreka oku orikubaasa kuhindura omurimo kwenda kuhwera abaana abaine ebyetengo by'okwega eby'omutaano hamwe n'obumuga nari oburema aha mibiri yaabo. Buri mwana n'ow'omutaano; n'ahabw'ekyo okuhabura oku nikutwarira hamwe abaana boona. Obumwe, omwana naatworekyerera mpaho atubaasisa kumanya eki arikwenda. Ku turikuguma nitukora emirimo egi n'abaana, nitweyongyera kuguma nitwetegyereza kandi nitukora kurungiho aha bikwatiraine n'okubashagika, okumanya ebi barikubaasa kukora kurungi, ebi barikukunda kukora hamwe n'ebi barikwetenga.

Ni kirungi kuhwera omwana waawe, baitu reebuka ngu tiwaamukorera emirimo ei ashemeire kuba naayekorera - nibeetenga kuhuurira nk'abaine eki baakora kandi bakagira eki baahikaho. Otakaateekateeka ngu omwana tarikubaasa kukora omurimo ogwo. Noobaasa kusherura emiringo y'oburyo kandi erimu okuhangahanga eraakubaasise kuhindura omurimo kwenda ngu omwana abase kugukora.

Ahaifo nitukworeka bimwe aha biteekateeko aha miringo ei orikubaasa kwejunisa kuhindura emirimo ahabw'abaana abaine obumuga nari oburema nainga oburemeezi omu kwega. Ebiteekateeko ebi bibaasa kukoresibwa omu murimo gwona.

Abaana abaine oburemeezi omu kureeba nari kuhweza

- **Yejunise enyuguta mpango:** Omurimo gwaba gurimu okuhandiika, kyebera yaaba omwana arikworoberwa okushoma enyuguta mpango nainga enkye. Obumwe enyuguta enkye nizikora kurungi ahakuba ziine endeebeka nungi kandi nizihwezika gye ahabw'okugira ngu niziba zitakwataine; n'ahabw'ekyo tiziine eireeba n'eishoma.
- **Yejunise erangi:** Koresa erangi endijo kuhandiika ebigambo ebikuru omu kwombeka sentensi/ekibazo, (eky'okureeberaho, ebigrando nka 'a' nainga "na" nainga engambi ezikira kukoresibwa nka 'gamba', 'reeta' na 'ha'. Eki nikibaasa kureetera omwana yaayoroberwa okushoma nainga okuhandiika.
- **Yejunise ebikoresibwa ebirkukwatwaho** kukora hamwe n'okwombeka ebintu, kwenda ngu abaana abaine oburemeezi omu kureeba nari kuhweza babaase kukwata n'okuhuurira ebi bariyo nibakora nainga nibahangahanga, obwo barikwejunisa engaro. (Ekyokureeberaho, yombeka omunaara orikwejunisa ebintu ebikozirwe omu bikoresibwa bitari bimwe na bimwe.)
- **Shoboorora ebiri omu bishushani:** Omurimo ku guraabe gurimu ebishushani, ijuka kushoboororera omwana ebiri omuri ebyo bishushani.
- Ijuka ngu ebiteekateeko ebi nibibaasa kuhwera abaana boona, batari abo abaine oburemeezi omu kureeba/kuhweza bonka.

Abaana abaine oburemeezi omu kuhurira

- **Yejunise orurimi orw'obubonero** iwe n'omwana waawe mwaba nimurumanya. Nainga iwe n'omwana waawe mwege hamwe obumanyiso obu obworobi kandi obutandikirwaho.

- **Reeba omwana** otarikuhurira kurungi kandi ogambe omu muringo ogu orikubaasa kuhurirwamu kurungi (otakaayomba). Yejunise **orurimi rw'ebicweka by'omubiri orw'obumanyiso, nk'obwo obukorwa emikono n'engaro, hamwe n'obukorwa endeebeka y'ahamaisho nk'okukookootsa ahamaisho nari okusheka** kwenda ngu omwana ayetegyereze eki orikumanyisa.
- Teeraho kukorera emirimo omu myanya erimu ekyererezi kirikumara kwenda ngu omwana abaasa kureeba kurungi kandi ashome emigambre nari emigyendere y'eminwa yaawe. Gamba nk'okw'obutoosha, obwo otarikurahukiiriza nainga kwenaamuura, kandi otahebebera narishi okagamba ebitarikuhurirwa.
- Yejunise ekaraamu n'orupapura (nari cooka n'orubaaho) mwaba nimukora emirimo erikwetenga okuhandiika nainga okuteera ebishushani kwenda kugira ebi waashoboorora.
- Kyaba nikibaasika, yorekyerera omwana enkora y'emirimo omu mwanya gw'okushoboorora orikwejunisa ebigambo n'orurimi orw'obumanyiso.
- Ijuka ngu ebiteekateeko ebi nibibaasa kuhwera abaana boona, batari abo abaine oburemeezi omu kuhurira bonka.

Abaana abaine oburemeezi omu kutambura

- **Biika haihi ebirikukoresibwa omu kwega:** Reebuka ngu ebikoresibwa omu kwega ebirikwetengwa omu murimo ogwo byabiikwa ahu omwana arikubaasikirwa kubihika.
- **Teeraho kwejunisa ebikoresibwa ebiine obuhango oburikuhwera abaana kworoberwa kubikoresa.** (Ekyokureeberaho, ekaraamu n'obucumu obuhango bibaasa butagira eikwata.)
- **Yorekyerera kandi ohwere ebikorwa byabo ahu kirikwetengyesa,** (ekyokureeberaho, obaasa kuhwera omwana kujuumika ekinushu nainga ka-daisi mwaba nimazaana omwesho).
- **Kyendeeza omwanya:** Hindura omu mirimo kwenda ngu ekorerwe omu mwanya mukyeho, kandi ebemu okutambura kukye, (ekyokureeberaho, emirimo y'okuhiiga neebaasa kukorerwa omu kishengye kimwe, omu mwanya gw'okukorerewa omu nju yoona nainga aheeru).

Abaana abarikutwara obwire bwingiho kwega

- **Yorobya omurimo** kandi okore ekicweka kyagwo kyonka (Ekyokureeberaho, yeshongore (tongyerera) ekicweka kimwe kyonka, omu mwanya gwa bishatu; handiika orukarara rugufuhu omu ishomo ery'okukora 'enkarara.' Hoona nabwo omwana waawe naabaasa kuhandiika ebigambo omu mwanya gw'okuhandiika ekibazo nari sentensi ejewire kwenda kworeka nari kushoboorora ebiteekateeko.
- **Teera ebishushani omu mwanya gw'okuhandiika.** Emirimo emingi erimu okuteera ebishushani. Omu mirimo ei omwana arikushabwa kuhandiika, naabaasa kuteera ebishushani birikworeka ebiteekateeko omu mwanya gw'okuhandiika.
- **Shoboorora ebiragiro** omu matembezo nari amadaara agoorobi, obwo orikworeka ebiine kukorwa, reero oshabe omwana kukora ebi aine kukora, kimwe aha kindi. (Ekyokureeberaho: kwata ekaraamu n'orupapura, 2, teera ekishushani ky'enshonda nainga ekitaine nshonda, 3 kisiige, 4 kandi ohendere orikworeka ebicweka byakyo)
- **Garukamu ebiragiro** emirundi ebiri (02) nainga eshatu (03) kwenda ngu omwana abikwate kandi abyetegyereze.


Ogume orekye abaana bakwebembere. Nibaija kukureetera kumanya yaaba baayetegyereza, kandi baaba baine ekihika ky'okukora omurimo nainga. Koresa embabazi, hwera kandi oshagike abaana kandi otabagyemesereza kukora ekintu kyona. Obumwe nikirungi kwikiriza ngu omurimo gugumire, reero mpaho mukagukorera hamwe. Noobaasa kugira oti, "omurimo ogu gwine oku gugumiremu, tikwo? Nitubaasa kuteeraho kugukora hamwe?

ABC book

Noija kwetenga: Ekaraamu (ebirangi – ku waakuba obiine), orupapura, gaamu/guruuhu nainga empitirizo hamwe n'ehuuzi.

Eby'okukora:

- Kwata orupapura n'ebirangi oyeteguure.
- Noija kukora ekitabo ky'enyuguta/ebisidi. Kuba obupapura. Noija kwetenga empapura zingahi?
- Teekateeka kandi otebeekanise oku oraateere enyuguta. Noija kuteera buri nyuguta aha rupapura rwayo? Aha mpapura ibiri?
- Teekateeka aha muringo ogu oraateeremu enyuguta. Niziija kuba zitakwataine? Niziija kureebeka nk'ebishushani by'abantu ebiri nk'otunyaafu? Zisiige waaba oine ebirangi.
- Gaitamu ebigambo ebirikutandika n'enyuguta ahari buri rupapura. Noija kugaitaho ebishushani by'ebintu nari eby'enyamaishwa ebi nainga ezi amaziina gaazo garikutandika n'enyuguta egyo?
- Siiga, huuga kandi oteere ekipampagare nari ekishembesho ky'ekitabo. Ijuka kuhandiikaho eiziina ryawe nk'omuhandiiki w'ekyo kitabo).
- Kuba ekitabo reero oshabe omuntu mukuru aruke entango rwagati yaakyo arikwejunisa empitirizo n'ehuuzi nainga guruuhu/gaamu.



Omurimo ogundi:

- Shoma nainga oshabe omuntu ondijo akushomere ekitebyo ekiri ahaifo.

Akavuyo omu nsi y'enyuguta z'arifu/z'ebisidi

Eizooba rimwe, abarongo 'e' na 'e' bakacwamu kweshunga n'okushemererwa. Mpaho baaza ahagati y'ebigambo byona ebi baateekateekire. Bakahindura 'ship' (emeeri) kyaba 'sheep' (entaama), reero 'sheep' yaajuba/yaatoba kandi byagibuzaabuza, yaashoberwa. Aba barongo 'e' na 'e' bakahindura 'chick' (akaana k'enkoko/akakoko) kyaba 'cheek' (eitama), reero nyina w'ako kakoko ryarenga erikusherura akaana kaayo. Abarongo babiri aba bakahindura ekigambo 'stir' (vuruga/tabura) kyaba 'steer' (vuga), mpaho omuteeki tiyaayetegyereza eki yaabaire naakora. Hoona bakahindura eiziina ry'omuntu 'Will' (Buragwa) ryaba 'wheel' (enziga), reero Will yaahiringita aha kabungo yaashuumma. Abarongo bakasheka baarya ebinyantsi, baitu ezindi nyuguta zikatwara ekikorwa eki nk'ekitari ky'okushesya. Aha muheru gwa byona, mukuru w'ezo nyuguta akagira ati, "Ekyo nikimara." Reero atyo yaata abarongo 'e' na 'e' ahagati ya 'slip' (teerera) atyo yaabooohoreza kubyama (sleep).

- Noobaasa kukora ekitebyo ekyawé ekirikukwata aha nyuguta z'Omansi y'Enyuguta z'ebisidi nainga shi ez'arifu?

Emyaka: Puraimare

Obuhwezi bw'omuntu omukuru nainga mukuru w'omwana: Oburinganeire

Ebi oraayege (okumanya): Enyuguta z'arifu/ebisidi, okwega orurimi, ebigambo n'amakuru gaabyo hamwe n'okubihuunisa

Ebi oraate omu nkora: Okuhangahanga, okukorera hamwe/okukoresa ebicweka by'omubiri, okusiiga/okuhuuga

Emiringo y'okukoramú omurimo ogu:

- Himba ekyeshongoro ekirikukatwa aha nyuguta z'arifu/z'ebisidi.
- Shaba omuntu ondijo akuhwere kukora ekitabo.
- Yejunise otubaare nainga otudankara kukora enyuguta z'arifu/ebisidi aha meeza nainga ahansi.

Yombeka omunaara

Noija kwetenga: Akabaaho, ebipakiti bya purasitiika, otubokisi hamwe n'otubaare otutereire

Eby'okukora:

- Rundaana ebintu ebiine entango etereire omu bwingi nk'oku kirikubaasika. Ebi bibaasa kuba birimu ebibokisi ebikuzire, ecupa n'ebibokisi by'eb'y'okunywa ebiine otufundikizo nari otudankara, ebitabo, otubaare otwine ahansi ahatereire, egyaaga za purasitiika eziine ebifundikizo...
- Gyezaho kwombeka omunaara orikwejunisa ebintu ebi. N'enki eki waareeba aha bikwatiraine n'eki oraate aha mutwe gw'ekindi? Ebintu ebihango noija kubita nkahi? N'enki ekirikubaho waata obuntu obukye ahansi y'omunaara gwawe?
- Omunaara gwawe noobaasa kugwombeka kuhika aha buraingwa burikwingana ki? N'enki ekirikureetera omunaara gwawe kuhama gukaguma gwemereire nainga gukagwa? Okaakoraki kureebuka ngu gwayeyongyera kuhama?



Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okuringaaniza, okusiiga/okuhuuga

Ebi oraate omu nkora (emyoga): Okugyeza, okuhangahanga, okukorera hamwe/okukoresa ebicweka by'omubiri, hamwe n'okumanya ahu ori waaba ori omu mwanya waagyeryageranisa n'ebindi bintu hamwe n'abantu.

Emiringo y'okukoramu omurimo ogu:

- Shaba omuntu ondijo akuhwere kwombeka omunaara.
- Waaba oine oburemeezi omu kureeba, yejunise ebintu ebirikukwatwaho/ebiine enhonda kwenda ngu okaakwata kandi ohurira omunaara orikwejunisa engaro.
- Waaba oine oburemeezi omu kuringaaniza obuntu bukye, yejunise ebintu ebihango ebiraakworobere kuringaaniza.

Yombeka amaremesa

You will need: Ebibaije, ebintu ebihango nk'obubaaho, obuti, emipiira ya motoka ekuzire, n'ebindi.

Eby'okukora:

- Omuzaano gw'ebintu by'amaremesa nigukwata aha bintu ebi orikwetenga kuguruka, kuraba ahansi nainga okucwekanisa. Bibaasa kubamu okwiruka, okuguruka, okwajura, okutemba n'okuringaaniza. Obaasa kureetera amaremesa aga gaaguma nainga gaayoroba kurugiirira ahaky'orikwenda. Reeba ekyokureeberaho omu kishushani.
- Sherura omwanya (omunju nainga aheeru) ahu orikubaasa kukorera ebintu ebikora omuzaano gw'amaremesa. Rundaana ebintu ebi orikwetenga nk'obuti, amabaare, emipiira ya motoka ekuzire, ebibaije ebikuzire, n'ebindi. Banza obuuze omuntu omukuru yaaba noikirizibwa kukoresa ebintu ebi.



- Tereeza kandi oyombeke amaremesa gaawe. Teekateeka aha muntu oraakorese amaremesa aga. Amaremesa aga gakore agagumiremu baitu gataguma munonga gakarema omuntu ou orikugakorera!
- Gyezaho kuraba omuri ago maremesa – hariho ekintu kyona eki orikwenda kuhinduramu? Shaba omuntu akubarire obwire obu oraamare orikuraba omu maremesa ago? Noobaasa kugarabamu omu bwire burikwinganaki?



Emyaka: Puraimare

Obuhwezi bw'omuntu omukuru nainga mukuru w'omwana: Oburinganeire

Ebi oraayege (okumanya): Okutereeza, okuhunda, okusiiga, okuhuuga; okwombeka

Ebi oraate omu nkora (emyoga): Okuhangahanga, okurondera oburemeezi omubazi, okukorera hamwe/okukoresa ebicweka by'omubiri, okumanya ahu ori omu mwanya waagyeryeraganisa n'ebindi bintu.

Emiringo y'okukora omurimo:


- Yorobya amaremesa agu waakora ahabw'omuntu aine oburemeezi omu kutambura nainga okureeba nari okuhweza. Tamu entambura ezi barikubaasa, okuhiringita, okwajura nainga ebintu ebi barikubaasa kukwataho bakahurira n'engaro zaabo kwenda ngu bamanye ahu barikutoora.

'Calcumaze' (Ekijegyere ky'ebibaro)


Noija kwetenga: Ekaraamu/akacumu hamwe n'orupapura, cooka

Eby'okukora:

- Kopa ekishushani eki okite aha rupapura nainga otungye omwanya muhango ahu orikubaasa kukoresa cooka kukiteera ahansi.




- Omuzano ogu nigukwata aha kuzaanisa eshuura ibiri. Kuruga aha NTANDIKIIRIRO kuhika aha MUHERU, nootamburira aha misitaari. Noobaasa kutamburira aha musitaari ogugoororokire, obaasa kutamburira eryo nainga okorese ogundi muringo gwona og'okutambura orikukuratira emisitaari egi.
- Waaba nootamburira aha misitaari egoo, noobaasa kukora ekibaro (okugaita) orikwejunisa eshuura ezi waahingura, kwenda ngu ohendere n'eshuura ey'ahamuheru ku oraahike aha MUHERU.
- Eky'okureeberaho: Ni miringo eki ei orikubaasa kwejunisa kukora eshuura (namba) 8?




1.

$$2 \times 4 = 8$$



2.

$$2 + 2 + 4 = 8$$



3.

$$\begin{aligned} 3 \times 4 - 4 &= 8 \\ (12) - 4 &= 8 \end{aligned}$$

Answer: Ekigarukwamu:
Hariho emihando eshatu
erikubaasa kukuhisya
ahari munaana

■ Ebi nibyo biragiro ebiine kukuratirwa:

- ④ Buri muringo gushemeire kuba nigutaana aha gundi/ndiijo.
- ④ Tihariho omuringo ogushemeire kuraba aha mwanya/kacweka kurenga aha murundi gumwe.
- ④ Buri murundi ogu oraarabe aha namba/shuura, koresa okugaita, okwihihaho nainga okubaza kwenda kuta enamba/eshuura egoye omu kibaro kyawe.
- Nooreeba omuhanda oguraakuhiye aha namba/shuura 10? Kandi shi emihanda ebiri eraakuhiye aha namba/shuura 16? Handiika ebibaro byawe.

- Ni miringo ki endijo hamwe n'enamba nari eshuura z'aha muheru ebi orikubaasa kukora? Ni namba nari shuura ki erikukirayo obuhango ei orikubaasa kukora? Ni namba nari shuura ki erikukirayo obukye ei orikubaasa kukora? N'enamba zingahi zonna hamwe ez'aha muheru ezi orikubaasa kukora?

Ogundi murimo:

- Heereza ondijo muntu enamba y'ah'amuheru reero omushabe emihanda erikukuhisya aha namba nari shuura egoo. Omuntu ogu naabaasa kubona nari kuzoora emihanda ei waaba otakateekateekireho?
- Ta enamba ezaawe omu mwanya gw'ezo eziri omu kishushani.
- Enamba/eshuura zonna nizibaasika baitu nikikuru kukoresa eshuura nari enamba emwe nainga ibiri.
- Hoona nabwo noobaasa kukoresa enamba ezooreka ebicweka kwenda ngu oyongyere kugumya ekibaro. Ekyokureeberaho: $0.5 \times 4 = 2$ or $2.5 \times 5 = 12.5$.

Emyaka: Emyaka yoona

Obuhwezi bw'omuntu omukuru nainga mukuru w'omwana: Oburinganeire

Ebi oraayege (okumanya): Ebibaro, okugaita, okwihihao n'okubaza

Ebi oraate omu nkora (emyoga): Okurondera oburemeezi omubazi, okuteekateeka okugyendereire kucencura enshonga kukora encwamu ehikire, okukorera hamwe (oteebirwe n'enkoresa nungi y'ebicweka by'omubiri), okukwatanisa nari enkwatanisa.

Emiringo y'okukora omurimo:

- Kora ekijegyere kihango ahansi orikwejunisa cooka kandi okitamburireho kwenda ngu kikuhwere kwijuka kurungi ebibaro.
- Enamba z'aha kishushani zikomye ahari 1-5
- Sherura emiringo etari emwe n'emwe ei oraayejunise kuruga aha NTANDIKIIRIRO kuhika aha MUHERU, reero obare enamba/eshuura ezi oraarabeho (torikwetenga kuzigaita hamwe).

okuteeka orikwejunisa enamba nari eshuura

Noija kwetenga: Ekaraamu nainga akacumu n'orupapura, ebirungo, ebyokurya by'okuteeka, eby'okuteekyesa.

Eby'okukora:

- Cwamu eki orikwenda kuteeka. Tebeekanisa oku orikwenda kuteeka obwo oine omuntu omukuru nainga mukuru waawe ku waakuba nooyetenga obuhwezi.
- Handiika orukarara rw'ebi orikwenda kukoresa omu kuteeka, nk'ebirungo n'ebi oraateeke.
- Cwamu aha mubaro gw'abantu abu oraateekyere. Okuriisa aba bantu, buri kirungo noija kukyetenga mu bwingi/bipimo ki? Handiika obwingi/ebipimo haiha na buri kintu eki oraateeke n'ebirungo ebi oraakorese.
- Okaakoresa bwingi nari bipimo ki ku waakushabwa kuteekyera abantu ab'omubaro gwabo guri kabiri k'ogwo? Ekipweka ky'ogwo mubaro? Abantu babiri?
- Iriza haihi ebi orikwenda kuteeka, ebirungo ebi oraakorese n'ebi'okuteekyesa nk'eniyungu n'esoforia. Pima ebi oraateeke.
- Gaaniira aha matembezo (amadaara) nari ebiragiro by'okuteeka ebi orikwenda kuteeka, reero ohandiike buri itembezo (idaara) nari Kiragiro. Yejunise ebigambo ebirimu nka 'okushara,' 'okuhaata,' 'okutabura, okushigisa nari okuvuruga,' hamwe n'okutabura.'
- Kuratira buri itembezo (idaara) nari ekiragiro eky'enteeka kandi ogyende noohindura omu biragiro ebi waahandiika, teeraho nk'oku kirikubaasika kukora ebishoboorokire kwenda ngu abandi babaase kukuratira enteeka yaawe.
- Ku oraheze kuteeka, yeta ab'eka yaawe kwija kurya ebi waateeka.
- Teekateeka aha kugabura nari kubaganisa ebi waateeka kwenda ngu bihike boona abariho kandi buri omwe atungye nk'ebya mutaahi we. Buri muntu ashemeire kutunga ebigiiko, ebishate nari ebicweka bingahi? Hariho ebyokurya birikumara kubaasisa abantu kwetyongyeza omurundi gwa kabiri?

Omurimo ogundi:

- Handiika kurungi enteeka nari ebiine kukuratirwa omu kuteeka kwenda ngu ondiijo muntu weena abaase kukuratira ebi biragiro. Bashabe kukuratira ebiragiro ebi nari enteeka egi, reero bakugambire yaaba byaba bishoboorkire hamwe na haaba hariho ebi waakubaasa kuhinduramu.



- Toorana enteeka eraakubaasise kubaganisamu ebi waateeka kukoram obucweka / obushate. Ebi birimu nk'okuteeka keeki, busikwiti nainga okusharashara ebijuma kukoram saradi. Koramu ebicweka bitari bimwe na bimwe nari ebishate reero obihandiike (nk'oku ekishushani eky'aharuguru kirikworeka).
- Kora ekitabo ekirimu endagiiriro, enteeka, emiteekyere, ebiragiro by'okuteeka ebyokurya ebi orikukunda.

Emyaka: Emyaka yoona

Obuhwezi bw'omuntu omukuru nainga mukuru w'omwana: Oburinganeire nari obw'ahaiguru

Ebi oraate omu nkora (emyoga): Okubara, okuta okubara omu nkora, okupima, okuteebekanisa enteeka nari emiteekyere y'ebyokurya

Ebi oraate omu nkora: Okuhangahanga, okuhurizana, okurondera ebizibu omubazi, okuteekateeka okugyendereire kucencura enshonga kukora encwamu ehikire, okukorera hamwe (oteebirwe n'enkoresa nungi y'ebicweka by'omubiri)


Emiringo y'okukora omurimo:

- Shaba omuntu akuhwere omu kuteeka.
- Toorana ebicweka by'okuteeka ebi orikubaasa kwekorera. Noobaasa kutabura/kujwanzya eby'okuteekyesa? Noobaasa kugira ebi waashuka omu bindi ebiri omu soforia?
- Gambira abaana ebiragiro ebikuratirwa omu kuteeka omu mwanya gw'okubihandiika.
- Shaba ondiijo muntu ahandiike ebiragiro nari ebikuratirwa omu kuteeka.
- Teera ebishushani bya buri idaara eriine kukuratirwa omu nteeka egi.

Tebeekanisa omwesho

Noija kwetenga: Ebirangi nainga obucumu, orupapura oruhango, obuntu, makansi, daisi (nainga daisi ekozirwe omu mpapura).

Eby'okukora:

- Iriza haihi orupapura n'ebirangi/ekaraamu z'erangi nyingi kyaba nikibaasika. Ta orupapura ruhango orutaine kiriho/orutaine misitaari aha meeza nainga ahansi.
- 
- RULES**

 1. If you land on a 'fact' pick up a fact card
 2. If you land on a 'fun' pick up a fun fact card
 3. If you can't answer a question with 2, go back 1
 4. Follow the instructions on the square you land on

By Aya and Taha
- Teera omusitaari guraabe omu rupapura. Rubaganisemu okore obubokisi.
 - Toorana omuheru gw'orubaju rumwe kuba obutandikiro n'orundi kuba omuheru. (Reebera aha kishushani eky'ahaifo).
 - Aha bubokisi obumwe handiikaho 'tunga kaada.' Aha bundi handiikaho 'garuka aha myanya etaine kihandiikireho.' Aha bundi bubokisi handiikaho 'waaguruka.' Oine ebundi biteekateeko aha ku waakubaasa kuragiirira abazaani kugyenda omu maisho nainga kugaruka enyima? Obubokisi obwingi burekye burimu busha. Nooyetenga ebigyezo birikumara kwenda ngu omuzaano gugume guboneire, baitu torikwetenga kugyezibwa okugumire munonga okurikubaasa kureeta kyaguma kusinga omuzaano.
 - Okukora kaada, shara obubokisi omu bupapura. Ahari buri rubaju orumwe handiikaho ekiine okukuratirwa (ekiragiro) nari omurimo. Hangahanga kandi ogyezeho kugira emiringo mingi y'ebiine okukuratirwa/ebiragiro. Ekyokureeberaho:
 - ↪ Amazima g'ebibaro by'ebipimo ebiruhindahinduka: Bariira omu bushatu (3s), emikaaga (6s), hamwe n'omu minaana (8s) ...
 - ↪ Ebikorwa by'ebicweka by'omubiri: Yetooroore emirundi eshatu, kwata aha mutwe reero osiitirire aha nda obwo orikubara kuhisya ahari 20.

- ↪ Kora orukarara rw'ebigambo ebirikuhendera n'amaraka agarikushushana
 - ↪ Yeshongore ekyeshongoro
 - ↪ Okumanya okuruga haingi: Heereza amazina 5 g'endembo nkuru z'amahanga...
- N'oha oraazaane naiwe? Ondijo muntu omwe? Heereza buri muntu akantu aku araatambure nako omu muhanda nari musitaari.
 - Iwe n'abandi bazaani mwikirizane aha biine okukuratirwa omu muzaano ogu, n'oha oraabanze? N'enki ekiraabeho ku haakugira omuntu owaaremwa kukora eki ashemeire kukora nari omurimo gwe omu muzaano ogu? Nimubaasa kuhwerahwerana buri omwe akakora orubu rwe? Ku muraaheze kwikirizana aha biine kukuratirwa nari omu biragiro, mutandike kuzaana.
 - Juumika kaada z'omuzaano haihi n'akabaaho k'omwesho. Buri omwe naija kugira orubu rwe rw'okuhindura kandi akahiringisa daisi. Buri omwe naija kutambuza akantu ke aha muhanda/musitaari karabe omu mubaro gw'obubokisi oburikwingana n'omuhendo gwa daisi.
 - Obuntu obu nibugwa nkahi? Kora eki obubokisi burikukworeka. Omuzaani akore eki akakaada aku araagweho karikuragiira. Omuzaani ku araabe atarikubaasa kukora eki, reeba eki ebiragiro namunonga ebiine kukuratirwa birikugam ba. Omuzaani araabanze kuhika aha muheru niwe araasinge.

Emyaka: 8+

Obuhwezi bw'omuntu omukuru nainga mukuru w'omwana: Oburinganeire

Ebi oraayege (okumanya): Okwetegyereza orurimi, okukoresa eshuura/enamba

Ebi oraate omu nkora (emyoga): Okukwatanisa/enkwatanisa, okukorera hamwe (oteebirwe n'enkoresa nungi y'ebicweka by'omubiri), okuteekateeka okugyendereire kucencura enhsonga kukora encwamu ehikire, okuhangahanga

Emiringo y'okukora omurimo:

- Yegaite n'omuntu omukuru muzaane.
- Yorobya omuzaano obwo orikwihamu obubokisi obumwe.
- Teera omuhanda/omusitaari aha nkogoto obwo orikwejunisa cooka kwenda ngu orabe aha mwanya gw'ekyesho (eki waaramba ahansi kikashusha nk'akabaaho k'omwesho).

Nooreeba eki ndikureeba?

Noija kwetenga: Ekaraamu nainga akacumu hamwe n'orupapura

Eby'okukora:

- Teera ekishushani.
- Ekirikukurataho, handiika ebiine kukuratirwa omu kuteera ekishushani.
- Shaba ondiijo muntu akuratire ebiragiro by'okuteera ekishushani eki obwo otamwikiriize kureeba eki waateera.
- Ku araamare, mugyeragyeranise ebishushani ebi mwateera. N'enki eki orikubiteekateekaho? Nibishushana nainga biine entaaniso? Ahabw'enki biine entaaniso? Ni ki ekibaire nikibaasa kubireetera byayenda kushushana?

Emyaka: Yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, ebikuratirwa omu kuhandiika/ebiragiro by'okuhandiika

Ebi oraate omu nkora (emyoga): Okuhangahanga, okukorera hamwe (oteebirwe n'enkoresa nungi y'ebicweka by'omubiri), Okukwatanisa/enkwatanisa

Emiringo y'okukora omurimo:


- Gamba ebiine kukuratirwa/ebiragiro omu mwanya gw'okubihandiika.
- Yoreka ku waateera ekishushani.
- Kora ekishushani orikwejunisa eibumba nainga okiteere omu musheenyi/omu byondo.

Teera ekinyamaishwa eki oyeteekateekiire

Noija kwetenga: Ebirangi nainga ekaraamu n'orupapura

Eby'okukora:

- Tunga orupapura n'ekaraamu obiirize haihi, aha burungi toorana ebirangi bitarikushushana.
- Noobaasa kuteekateeka aha njangu eine eruguru nk'ah'enjojo? Nainga embwa eine ekikogosho nk'eky'akanyankogote? Ekyo noogira ngu kikaashusha ki?
- Teera ekinyamaishwa eki oyeteekateekiire kandi ekiine ebicweka bitarikushushana. Ramba ebicweka byakyo ebitari bimwe na bimwe (heereza amaziina g'ebyo bicweka).
- Heereza ekinyamaishwa eki waayeteekateekyera eiziina. Eiziina eri ribaasa kuba niryorekyerera enyamaishwa ezitarikushushana ezi waakoresa omu kuteera nya-kinyamaishwa.



Ogundi murimo:

- **Teekateeka/yeshushanirize:** Ekinyamaishwa eki nikituura nkahi? Omu nsi yaitu ei turikutuuramu nainga endiijo? Egyo nsi n'eya muringo ki? Nikirya ki? Nikigamba kita? Nikitambura kita? Ebyo bicweka byakyo eby'omutaano kikabiiha nkahi?
- **Tebya/handiika ekitebyo** aha kinyamaishwa eki.
- **Shoma ekitebyo eki** (nainga oshabe omuntu akikushomere) kwenda ngu otunge ebiteekateeko ebikirimu:

Waruhitsi na Wakame

Waruhitsi ekaguza emboga zaayo omu katare, kwonka Wakame yaagiganzya, obwo egumize eti, "Torikubaasa kwiruka nkaanye, nookibaasa? Okuzire kandi n'okuhweza tokihweza kurungi."

Wakame ekazina erikwetooroora Waruhitsi kandi erikuteeraho kugibakura baitu yaaremwa, reero mpaho yairuka erikusheka.

Eizooba rimwe, Waruhitsi ekateekateeka eti: 'Niinyija kukworeka omushana, iwe Wakame!' N'ahabw'ekyo Waruhitsi ekabaiha yaayegirisa nk'eyeyongyeire kuremwa okuhweza, mpaho yaajwara gaarubindi.

Eki kikaheereza Wakame amaani, yaayongyera kurahura Waruhitsi, kandi yaaguma neegiirira haihi. Eizooba rimwe, Waruhitsi ekeejunisa ebigyere byayo kukwata Wakame, obwo erikuginyankura amatu, mpaho yaagihamya. Waruhitsi ekashusha nk'eyatandika kurya Wakame obwo erikutandikira aha matu. Wakame ekatandika kunyurizana n'okutetema baitu Waruhitsi yaaguma neegijeereeza kandi erikugishungura omu mwanya obwo, erikugikoza ahansi n'ahaiguru, egihamize amatu. Amatu ga Wakame gakeeyongyera oburaingwa okuhisya obu yaasyookire omu nshaya za Waruhitsi (amaino ga Waruhitsi egi eyaabaire ekuzire gakaba gatari marungi). Wakame ekairuka n'agaayo goona kuruga omu katare, omu tauni, kuruga ahari Waruhitsi. Eki nikyo orikureebera zaawakame (obume) ziine (bwine) amatu maraingwa.

Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Endeebeka nari enkora nainga emireebekyere y'ebintu n'erangi, enhoboorora (orurimi orukoresibwa kushoboorora)

Ebi oraate omu nkora (emyoga): Okuhangahanga, okukorera hamwe (oteebirwe n'encoresa nungi y'ebicweka by'omubiri)

Emiringo y'okukora omurimo:

- Shoboorora ebirikukwata aha nyamaishwa. Yegyesa ondijo omuntu kuteera ekinyamaishwa.
- Yejunise eibumba, ebicupa nainga ebipakiti ebi batakikoresa nainga ebikuzire kukora enyamaishwa.

Teera orurembo oru oyeteekateekiire nari oru oraahangahangire omu mutwe gwawe

Noija kwetenga: Orupapura n'ekaraamu/ebirangi

Eby'okukora:

- Yeteguure n'orupapura ruhango hamwe n'ekaraamu.
- Shaba omuntu kukushomera ebi mpore-mpore kwenda ngu ohumize reero oteekateeke/oteeremu akashushane.

Humiza oteekateeke aha rurembo rwawe. Teeramu akashushani oriyo nootambura aha ruguuto rumwe rw'orwo rurembo. Orurembo rwawe nirushushana ruta? Rwine byombeko ki? Ebyombeko n'eba buraingwa ki? Entambura erikukoresibwa n'eya muringo nari kika ki? Harimu egaari y'omwika? Rurimu emit i n'ah'okuhuumurira? Nainga n'orurembo rwa nyentsya orurimu emotoka ezirikuguruka nk'enyonyi. Makara edakiika nkye orikuteekateeka ahari orwo rurembo.

- Humuura. Teera orurembo rwawe. Teekateeka kurungi ahu ebyombeko biraaze hamwe n'ebindi ebi oraatemu. Banza okore orukanga nari orukarara reero oije omariire ebi orikwenda kutamu bwanyima. Yejunise erangi zitari zimwe na zimwe waaba oine ebirangi.
- Orurembo rwawe noija kuruha eiziina ki?
- Garuka orebe aha rurembo rwawe orwetegyereze. Haine ekyakweba? Kandi omugyera nainga omwanya gw'okuzaaniram? Kyorobi abantu kutambura omu rurembo? Kandi abantu abaine obumuga/oburema aha mibiri yaabo? Hangusya orurembo rwawe kwenda ngu ogaitemu ebintu ebi.



Emyaka: Puraimare

Obuhwezi bw'omuntu omukuru nainga mukuru w'omwana: Oburinganeire

Ebi oraayege (okumanya): Okwetegyereza orurimi, obuhango, oburaingwa nari orurengo, oku endembo zirikukora nainga zirikutwazibwa

Ebi oraate omu nkora (emyoga): Okuhangahanga, okutebeekanisa nari okubariirira, Okutereeza, okuhunda, okusiiga nari okuhuuga, okurondera ebizibu omubazi

Emiringo y'okukora omurimo:

- Heereza omuntu ebiine kukuratirwa reero omushabe agire ekishushani eki yaakuteerera.
- Yombeka orurembo rwawe orikwejunisa ebibokisi ebirimu busha, ebipaketi ebigurirwamu ebyokurya n'ebiyokunywa, obuti n'amabaare.
- Teera ekyaro ekirimu amariisizo n'emisiri nainga etauni omu mwanya gw'orurembo.

Ebi orikukirayo kukunda

Noija kwetenga: Ekaraamu nainga akacumu n'orupapura hamwe n'erangi

Eby'okukora:

- Teera ekishushani ky'engaro ahagati y'orupapura obwo orikwetoorooza ekaraamu
- Aha kishushani ky'ekinkumu nari ky'ekyara-kishaija kyawe, handiikaho erangi ei orikukira kukunda. Noobaasa n'okukisiiga egyo rangi?
- Aha bishushani (enkanga) z'enkumu zaawe, handiikaho eishomo eri okukirayo kukunda, ebyokurya ebi orikukirayo kukunda, omuzaano ogu orikukunda, hamwe n'enyamaishwa ei orikukirayo kukunda.
- Omwanya oguraasigare, gusiigemu ebishushani by'ebintu ebi orikukirayo kukunda!



Omurimo ogundi:

- Teekateeka ebintu bitarikushushana ebi oraahandiike aha nkumu; ebi bibaasa kuba biri ebi orikukirayo kukunda nainga emiringo y'ebigambo nk'endembo nkuru z'amahanga, ebibaije ebiri omu nju yaanyu, ebi orikukunda kukora, n'ebindi.



Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi

Ebi oraate omu nkora (emyoga): Okuhangahanga, okukorera hamwe (oteebirwe n'enkoresa nungi y'ebicweka by'omubiri)

Emiringo y'okukora emirimo:

- Shaba omuntu ateere ekishushani nari orukanga obwo arikwetoorooza engaro zaawe n'ekaraamu.
- Gambira ogwo muntu ebintu ebi orikukirayo kukunda kandi omushabe abikuhandiikire.
- Teekateeka aha bindi bintu ebi orikukirayo kukunda ebi oshemeire kugaitaho.

Zeereeza eryato ryawe aha mutwe gw'amaizi

Noija kwetenga: Ekipta/ekityubu kya purasitiika ekikuzire nainga ecupa, orupapura nari omwenda, amabaare

Eby'okukora:

- Tunga Ekipta/ekityubu kya purasitiika ekikuzire nainga ecupa ya purasitiika ekuzire ebe niyo yaaba eryato ryawe. Kora eryato ryawe. Noija kutaho akashara-muyaga?
- Zeereeza eryato ryawe omu baketi y'amaizi nainga akadiba. Nirizeereeraho mu muringo ki? Noobaasa kurireetera ryatamburira aha maizi?
- Ronda amabaare. Nirija kuzamu amabaare angahi ritakatobeire?



Ogundi murimo:

- Noobaasa kukora eryato kuruga omu kindi kintu? Ekyokureeberaho, nk'okurikora omu mpapura? Eki nikihindura omubaro gw'amabaare agaraareetere eryato ryaibira/ryatobera?

Emyaka: Puraimare

Obuhwezi bw'omuntu omukuru nainga mukuru w'omwana: Bukye / buringaneire

Ebi oraayege (okumanya): Sayansi (entambura y'ebintu, obwire n'omwanya), oburemeezi bw'ebintu

Ebi oraate omu nkora (emyoga): Okuhangahanga, okukorera hamwe (oteebirwe n'enkoresa nungi y'ebicweka by'omubiri), Okutereeza/okuhunda/okusiiga/okuhuuga

Emiringo y'okukora omurimo:

- Gyezesha ebintu bitari bimwe na bimwe kureeba yaaba nibizeereera aha maizi nainga nibiibira/nibitobera.
- Kora omurimo ogu waaba ori omu kinaabiro nainga aha mwanya gw'ekiyungu ahu ebintu byogyezibwa nari nk'ahakatandaaro.

okuza omu katare nari ekikomera

Noija kwetenga: Ebintu by'okuguza aha mudaara gwawe omu katare, ekaraamu n'orupapura, amabaare n'obudankara.

Eby'okukora:

- Ronda omwanya gw'okutaho omudaara gwawe gw'akatare. Noobaasa kukoresa akameeza nainga omwanya gw'ahansi hoona ahu oraabone.
- Cwamu ebintu ebi orikwenda kuguza aha mudaara gwawe. Ebyokurya? Ebijwaro? Ebitabo? Nainga cakara?
- Rundaana ebintu by'omudaara gwawe. Buuza omuntu mukuru nainga mukuru waawe yaaba barikubaasa kugira ebintu ebibaakuteiza. Hoona nabwo noobaasa kwejunisa amabaare, amapeesha, obudankara, amababi, n'amataagi bikore nk'ebintu ebi orikuza kuguza.
- Yejunise amabaare n'obudankara nka sente. Ronda akabokisi aku oraabeikemu sente. Reebuka ngu oine orupapura n'ekaraamu kwenda ngu omanyemihendo ei oraagurizeho ebintu byawe.
- Tebeekanisa omudaara gwawe. Yoreka ebintu by'aha mudaara gwawe omu muringo murungi. Handiika emihendo aha bupapura reero obute aharubaju rw'ebintu ebiri aha mudaara.
- N'oha araije kugura ebintu omuduuka yaawe? Abu orikuzaarwa nabo/bakuru baawe na barumuna baawe? Ab'eka yaawe? Igura eduuka yaawe kandi oyete abantu baije bakugureho.
- Reetera omurimo gwawe gwaba ogurikushemeza kurabira omubutaba na bintu ebi abaguzi barikwenda. Guza ebindi bintu nainga oshabe emihendo y'ahaiguru kandi oshoboororere abaguzi ahabw'enki waagyongyeza. Emihendo eyongyezeibwe nibagiikiriza?



Emyaka: Puraimare

Obuhwezi bw'omuntu omukuru nainga mukuru w'omwana: Buringaneire

Ebi oraayege (okumanya): Okugaita n'okwihihaho, hamwe n'okubara eby'okucwa aha mihendo y'ebintu, orurimi rw'okugura n'okuguza

Ebi oraate omu nkora (emyoga): Okukwatanisa/enkwatanisa, okuramuza, okukoregana, okuhangahanga, okurondera ebizibu omubazi

Emiringo y'okukora omurimo:

- Korera hamwe na murumuna/mukuru waawe nainga omuntu omukuru kukora obupapura nari obupande bw'emihendo.
- Taana embu n'ondijo muntu nk'orikuguza (ow'eduuka) n'omuguzi.

N'ebigambo bingahi...?

Noija kwetenga: Ekaraamu nainga akacumu n'orupapura

Eby'okukora:

- Handiika ekibazo eki/sentensi egi omu Rungyereza/Runyankore-Rukiga 'Learning at home is fun'.
- Reeba omubaro gw'ebigambo ebitarikushushana eby'Orungyereza/Runyankore-Rukiga ebi orikubaasa kukora omu kibazo/sentensi, reero okore orukarara rwabyo, ekyokureeberaho: Learn, ring, mat, lama, night.
- Noobaasa kukora ekibazo kisya/sentensi nsya kuruga omu rukarara rw'ebigambo oru waakora?
- Kora ekibazo/sentensi omu rurimi rwawe reero orebe omubaro gw'ebigambo ogu orikubaasa kwihamu. Ebaasa kuba sentensi egoy nainga erikutaana nayo.
- Reeba sentensi erikukurataho eri omu Rungyereza kandi erimu buri nyuguta ya arifu nari ebisidi: 'The quick brown fox jumps over the lazy dog.'
- Noobaasa kukora sentensi eri/ekibazo ekiri omu Runyankore-Rukiga ekirimu enyuguta zonna?

Ogundi murimo:

- Kora akazaano k'okukora n'okutoorana ebigambo obwo orikwejunisa ebi bigambo ebisia. Hangahanga ekitebyo orikwejunisa ebigambo bisya ebi.

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okuhandiika, okumanya nari okugamba enyuguta eziri omu kigambo nari okuhuunisa, enkora y'ekibazo nari sentensi

Ebi oraate omu nkora (emyoga): Okutereeza, enkuratanisa y'ebigambo, okuhangahanga

Emiringo y'okukora omurimo:

- Teera ebishushani by'ebigambo ebi omu mwanya gw'okubihandiika.
- Gambira ondijo omuntu ebigambo byawe, reero abikuhandiikire.

Kuri noogira ngu ndi omwebembezi mukuru ow'eihanga (Purezidenti)...

Noija kwetenga: Ekaraamu nainga akacumu n'orupapura

Eby'okukora:

- Yeshushanirize ngu ori Purezidenti (omwebembezi omukuru ow'eihanga ryawe). Ni kintu ki eki waakubanza kuhindura? N'enki eki waakwenzire kukora aha nshonga ezi:
 - ⌚ Obwegyese (ekyokureeberaho, amashomero n'abeegyesa)
 - ⌚ Eby'obuhangwa bw'ensi (ekyokureeberaho, okurinda obuhngwa bw'ensi)
 - ⌚ Eby'amagara (ekyokureeberaho, amarwariro, abashaho, abashahokazi, abanansi)
 - ⌚ Eby'engyenda nari entambura (ekyokureeberaho, oku abantu barikutambura nari barikukora engyendo zaabo)
- Hariho guruupu z'abantu ezi okwenzire kuhwera? Ni baahi? Okaabahwera ota?



- Kopoorora ebibazo ebi narishi sentensi ezi reero obimariire orikwejunisa ebigambo byawe.

Kuri ndi Purezidenti ... (eiziina ryawe)

Kuri ndi Purezidenti we ihanga rya..... nka
 reero aho nka
 Hakaabaireho hariho
 Nkasharizemu
 Tihaakubaire hakiriho
 Nkaareebukire ngu

Kyateebwaho omukono: _____

- Yongyeraho ebindi bibazo nari ezindi sentensi nk'oku kirikwetengwa.
- Korayo okugamba okurikweshushaniriza nk'okwa Purezidenti (mukuru w'eihanga) obwo orikushoma ebibazo nari sentensi ebi waahandiika. Zishome zihurirwe, obwo orikweyesiga.

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, ebikuratirwa omu kuhandiika orurimi

Ebi oraate omu nkora (emyoga): Okuhangahanga, okuteekateeka okugyendereire kucencura enshonga kukora encwamu ehikire, okukwatanisa nari enkwatanisa, okugambira omu bantu

Emiringo y'okukora omurimo:

- Shaba omuntu akuhwere kuhandiika ebibazo nari sentensi zaawe.
- Teera ebishushani by'ebintu ebi orikwenda kuhindura.
- Hati yeshushanirize ngu niiwe mukuru w'ekyaro, meeya nainga omunyabutegyeki nari omwebembezi ow'omu kyanga kyanyu.
- Yeta ab'eka yaawe bakubuuze ebibuuzo kandi ogarukemu orikweshushaniiriza nka Purezidenti.

Gaaniira n'omuntu okuzire (omukaikuru/omugurusi)

Noija kwetenga: Ekaraamu nainga akacumu hamwe n'orupapura

Eby'okukora:

- Ronda omuntu okuzire ou orikwenda kubuuza/kugaaniira nawe. Abaasa kuba ari ow'omuka yaanyu nainga ow'omu kyanga kyanyu.
- N'enki eki orikumukundaho? Nooyenda kumubuuza ki? Obuto bwe (buto ye) n'oku yaakuzire? Empindahinduka ezi areebire? Bimwe aha bi arabiremu?
- Handiika ebibuuzo ebi orikwenda kumubuuza, reero obitereeze omu muringo ogu orikwenda kubikuratanisa waaba noobibuza.
- Yegyezemu obwo orikushushaniriza mukuru waawe nainga ondiijo muntu mukuru weena ogwo muntu ou orikuza kubuuza nari kugaaniira nawe. Buuza mukuru waawe/omuntu mukuru ebi orikwenda kubuuza omuntu akuzire nk'omugurusi nari omukaikuru. Eki nikija kukuhwera kureeba yaaba oine eki orikwenda kuhindura omu bibuuzo n'entebeekanisa y'ekigaaniiro eki. Ouogaaneire nawe nari ou obuurize atekateekire nguogaaneire nari omubuurize omu muringo gw'obunywani? Obaire otanire ekirenga? Ou obuurize nari ogaaeneire nawe abaire naayenda obwire kwongyera kukugambira bingiho?
- Kora empindahinduka ezi orikuteekateeka ngu oine kukora ahanyima y'okwegyezamu.
- Nooyetenga ebindi bibuuzo? Okukyendeeza aha bi oine? Hariho ebibuuzo ebi oine kuhinduramu?
- Gumizamu okore ekigaaniiro eki nari obuuze omuntu akuzire. Mwebaze ahabw'okukuha obwire bwe.

Ogundi murimo:

- Handiika ekigaaniiro eki/ebibuuzo n'ebigarukwamu, reero obikoremu ekihandiiko ekiraakuratirwe kubishohoza aha reediyo y'omu kyanga kyanyu hamwe nainga n'ekihandiiko nari ekitebyo ekiraashohozibwe omu rupapura rw'amakuru orw'omu kyanga kyanyu.



Emyaka: 8+

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, okwega ebirikukwata aha byafaayo by'eka hamwe n'ekyanga ebyabaireho omu ka hamwe n'omu kyanga

Ebi oraate omu nkora (emyoga): Okukwatanisa nari enkwatanisa, okutebeekanisa ebigaaniiro n'okubuuza abantu, okuteekateeka okugyendereire kucencura enshonga kukora encwamu ehikire

Emiringo y'okukora omurimo:

- Shaba omuntu ondijjo abanze akubuuze, kwenda ngu omany ebi oine kubuuza.
- Handiika ebibuuzo ebi oraabuuze omu nyuguta empango kwenda ngu bikworobere kubireeba n'okubishoma
- Ebibuuzo bicwe bugufu kwenda ngu bikworobere kubiijuka.
- Shaba ou waabuuza akugambire ebigarukwamu omu bugufu kwenda ngu obihandiike.

Heesha, kora ekyoma nari ekikoresibwa

Noija kwetenga: Ekaraamu nainga akacumu hamwe n'orupapura

Eby'okukora:

- Teekateeka aha kyoma nainga ekindi kintu ekikoresibwa omu magara g'obutoosha eki orikwenda kuheesha. Nikikora ki? Obundi n'ekintu ekirikubaasa kuhwera abantu? Noobaasa kuza aha rugyendo nakyo? Kikozirwe omuri ki? Nikyejunisa amashanyarazi?
- Teera ekishushani ky'ekyoma eki nari ekintu ekikoresibwa omu magara g'obutoosha kandi orambe nari oyoreke ebicweka byakyo ebitari bimwe na bimwe. Ebicweka byakyo ebyo n'ebya mugasho ki?
- Handiika ebirikukwata aha kyoma kyawe nari ekintu ekikoresibwa omu magara g'obutoosha? Noobaasa kushoboorora oku kirikukora? N'enki eki orikubaasa kukora waaba oine ekyo kyoma nari ekintu ekyejunisibwa omu magara g'obutoosha?

Ogundi murimo:

- Kora ekyoma/ekintu ekyejunisibwa omu magara g'obutoosha kuruga omu bintu ebyakoresiibweho. Ekyokureeberaho, ronda ebibokisi n'ecupa za purasitiika ebyakoresiibweho. Handiika aha bicweka bitari bimwe na bimwe eby'ekyoma kyawe waaba nooyenda.
- Kora ekirango nari akarango k'ekyoma kyawe nari ekintu ekikoresibwa omu magara g'obutoosha? Ekyoma kyawe kiine birungi ki ebi orikwenda ngu abantu bamanye reero baije bagure? Nibabaasa kukishanga nkahi baaba nibenda kukigura? N'enki ebi ekyoma eki nari ekikoresibwa eki kirikukora ekiraareetere abantu baakigura? Nikija kushemeza nari kuhindura amagra g'abantu mu muringo ki? Nikigura sente zingahi? Handiika ekirango nari akarango kaawe okahe orupapura rw'amakuru orw'omu kyanga kyanyu.



Emyaka: Puraimare

Obuhwezi bw'omuntu omukuru nainga mukuru w'omwanap: Bukye

Ebi oraayege (okumanya): Okwetegyereza orurimi, okuhandiika, okumanya/okugamba enyuguta eziri omu kigambo/okuhuunisa

Ebi oraate omu nkora (emyoga): Okuhangahanga, okurondera ebizibu omubazi, okuteekateeka okugyendereire kucencura enhsonga kukora encwamu ehikire, okukwatanisa nari enkwatanisa, okumanya ahu ori waaba ori omu mwanya waagyeryeranisa n'ebindi bintu hamwe n'abantu.

Emiringo y'okukora omurimo:

- Shaba omuntu akuteerere ekishushani
- Kora endeebeka nari orukanga rw'ekintu eki oraakore omu ibumba
- Shaba omuntu akuhandiikire amaziina g'ebicweka by'eki waakora

okukora ebintu omu bikoresiibweho nari kasasiro

Noija kwetenga: Ebintu hamwe n'ebipakiti/ebishembesho ebikoresiibweho, ekaraamu nainga akacumu hamwe n'orupapura

Eby'okukora:

- Rundaana ebintu n'ebipakiti nari ebishembesho ebikoresiibweho. Ebi bibaasa kuba birimu ecupa za purasitiika, obudankara nari obufundikizo bw'amacupa, obubokisi bw'embaaho obw'obuhango butarikushushana, ebipakiti ebigurirwamu ebyokurya n'ebyokunywa, emyenda ekuzire, n'ebindi.
- Hoona nabwo gumizamu oronde ebintu eby'omu buhangwa nk'obuti, amabaare, amababi agoomire, eibumba nainga ebyondo.



- Teekateeka aha kintu
eki orikwenda kukora.
Eky'okuzaanisa? Kiine enziga
nari emipiira? Nainga ekishengye
nari ekiju ky'enyamaisha?
Ekiine ebisiika? Teekateeka aha
nkora nari emireebekyere y'eki
orkwenda kukora.
- Teera ekishushani kirikworeka
endeebeka n'enteereeza nari
enteekateeka y'ekyo eki orikuza
kukora.
- Kora ekintu eki waaba nooyenda
kukora.
- Garuka okireebe okyetegyereze.
Okaayongyera kukiboneza ota
kikeeyongyera kushemera?
N'enki ekyakubaasa kukyongyera
amaani, kikahama kandi
kikaguma? Nainga kikakireetera
kyatambura kurungi?



Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okutereeza/Okukora endebeeka (orukanga) rw'ekintu, ebyoma n'okukanika, okwombeka

Ebi oraate omu nkora (emyoga): Okuhangahanga, okurondera ebizibu omubazi, okukorera hamwe/okukoresa ebicweka by'omubiri, okumanya ahu ori waaba ori omu mwanya waagyeragyermanisa n'ebindi bintu hamwe n'abantu.

Emiringo y'okukora omurimo:

- Shaba omuntu akuhwere omu kukora ekintu eki orikwenda kukora.
- Reka endeebeka, orukanga nari enteereeza y'eki orikwenda kukora egume eyorobi – kora enyungu y'okukurizamu ekimera, ekintu eki orikubaasa kuhiringisa, nainga okakoresa omu muzaano gw'okubara.

okukora orukarara

Noija kwetenga: Ekaraamu nainga akacumu hamwe n'orupapura

Eby'okukora:

- Teekateeka aha bintu ebi orikubaasa kukorera enkarara:
 - ↪ Ebyeshongoro ebi orikukunda
 - ↪ Ebimera ebiri omu kyanga kyanyu
 - ↪ Ebintu ebirikukushemeza
 - ↪ Ebintu ebi orikumanya kukora kurungi munonga kukira ebindi
 - ↪ Ebintu ebi orikwendeza eka yaawe nainga yaanyu
- Gyezaho oteekateeke enkarara z'ebintu ebi orikusiimira Ruhanga n'abantu nainga ebyo ebi orikukunda kukora nari ebirikukushemeza kukora.
- Tooranamu kimwe omuri ebyo reero obikorere orukarara.
- Noobaasa kubaganisamu orukarara oru omu nkarara enkyeho? Ekyokureeberaho, ebimera ebiri omu kyanga kyanyu bibaasa kubaganisibwamu kabiri: ebi muri kurya n'ebyo ebi mutarikubaasa kurya.

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, okuhandiika, okumanya nari okugamba enyuguta eziri omu kigambo nari okuhuunisa

Ebi oraate omu nkora (emyoga): Okutereeza, enkuratanisa, okuhangahanga

Emiringo y'okukora omurimo:

- Shaba omuntu akuhandiikire orukarara.
- Teera orukarara rwawe
- Rundaana ebintu 10 ebirikushushana. Ebirikuruga omu musiri? Ebirikujwarwa / ebijwaro? Eby'omu kiyungu? Shaba omuntu akuhandiikire amaziina gaabyo.

Kora maapu y'ekyanga kyanyu

Noija kwetenga: Ekaraamu nainga akacumu hamwe n'orupapura

Eby'okukora:

- Tunga orupapura n'ekaraamu. Kikaabaire kirungi waatunga ebirangi nari ekaraamu z'erangi zitari zimwe na zimwe.
- Yeshushanirize nari teeramu akashushani orikutambura omu kyanga kyanyu. Nooreeba ki? (Amaju, ebyombeko, enguuto, emitii, nainga emyanya y'omutaano nk'amakanisa, emizigiti n'ah'okuzaanira).
- Teekateeka aha buraingwa bw'enguuto, emitii n'ebyombeko. Kandi emyanya etaine kirimu, ebishaayi, emisiri n'ebishaka? Akatare nari ekikomera? Eishomero? Hariho emyanya endijo ei orikubaasa kuteekateekaho?
- Cwamu oku orikwenda kuteera maapu yaawe. Noija kusiiga ebintu bitari bimwe na bimwe erangi z'omutaano? Noija kuteera buri kintu nk'oku kiri? Noija kukora ekishumuuruzo ekiraajwekyere ebindi bintu (nk'omushororongo gukiikakiikami kujwekyera akagyera, enziga y'erangi ya kinyansi kujwekyera omuti)?
- Orupapura rwawe nirwija kuba nirwingana ki? Noija kwejunisa orupapura rumwe? Ibiri?
- Buri kintu nikija kukorwa kirikwingana ki? Eishomero, omwanya gw'okuzaaniramu, enguuto, ebihandagazi, akatare, nibijja kuba nibingana ki?
- Teera maapu. Ramba emyanya etari emwe n'emwe nainga okore ekishumuuruzo ekiraajwekyere emyanya.



Ogundi murimo:

- **Yeshushaniirize:** nk'omuntu ku yaakukushaba ngu omurangire nari omworekyerere omuhanda ahu ashemeire kutoora kuza omu katare nainga aha mugyera. Handiika nainga omugambira oku ashemeire kugyenda nari omurangire. Ronda omuntu oraareebe aha maapu yaawe kandi akakushaba ngu omurangire nari omworekyerere.
- **Tebya/handiika ekitebyo** aha myanya y'omu kyanga. Eishomero rikatandika ryari? Hakaba hatwireho omwanya gw'okuzaaniram? Omu kyanga eki haarabairemu ekigwererezi nk'omwegyemure nainga eihunga (omuyaga gw'amaani)? Kandi ebintu bikuru eby'okwemurikira? Ekyanga kiine ebyafaayo nari ebyabaireho eby'omugasho byona? Hariho ekitebyo kyona ekirikukwata aha mizimu nainga ebyegenza ebi abantu batebya aha mwanya ogwo?
- **Kora orukanga** rw'ekyanga eki (yombeka ekyokureeberaho ky'ekyanga eki). Yejunise ebishembesho nari ebipakiti nainga ebibokisi ebikuzire ebi oraabone. Noobaasa kukora orukanga oru omu muringo oguraabaasise omuntu otarikuweza kuruhurira n'engaro kandi akabona obutooro. Okwejunisa obuguha nikubaasa kukuhwera munonga omu murimo ogu.

Emyaka: Emyaka yoona

Obuhwezi bw'omuntu omukuru nainga mukuru w'omwana: Oburinganeire / bwingi

Ebi oraayege (okumanya): Okwetegyereza orurimi, ebigambo ebishoboorora emyanya, orurimi orwejunisibwa kurangira nari kworekyerera abantu emyanya, ekyanga, emyanya n'ebintu ebikuru omu kyanga.

Ebi oraate omu nkora (emyoga): Okuhangahanga, okukorera hamwe nari okukoresa ebicweka by'omubiri, okuteera ebishushani/enkanga orikukuratira ebipimo, okujwekyerwa, okumanya ahu ori waaba ori omu mwanya waagyeragyeranisa n'ebindi bintu hamwe n'abantu, okureeba okeetegyereza.

Emiringo y'okukora omurimo:

- Shoboorora ebirikukwata aha mwanya reero oshabe omuntu ateere maapu yaagwo.
- Kora orukanga rw'okureeberaho orurikworeka omwanya ogwo n'ebigurimu (omu mwanya gwa maapu).
- Teera orukanga, puraani nari enteekateeka y'enju yaanyu nainga ekishengye kimwe ky'enju egi.
- Tebya ebitebyo ebikwatiraine n'omwanya ogu orikutuuramu reero oshabe omuntu abihandiike.

Kora enyamaishwa omu sokisi

Noija kwetenga: Sokisi ekuzire, naingwa baitu y'enyonjo, ekikaraamu/maaka nainga cooka, amapeesha agakuzire, empitirizo, ehuuzi, makanci n'ebiyoya.

Eby'okukora:

- Tunga sokisi ekuzire kandi naingwa. Gitemu engaro zaawe reero okore enyuguta C orikwejunisa enkumu zaawe n'ekyara-kishaija (eky'ekinkumu). Ta ekyara-kishaija omu mwanya gw'ekitsintsiino. Kizaanise okuhisya obu kiraashushe nk'omutwe ogwineho n'omunwa.
- Yejunise akacumu nainga cooka kuramba ahu amaisho garaaze. Juura sokisi egi reero obaziire amapeesha ahu waaramba ngu hashemeire kuba hari amaisho.
- Yongyeraho amooya nari ebyoya kukora eishokye. Okukora eki, shara ebyoya nari pamba eby'oburaingwa nibwo bumwe reero obikome rwagati, mpaho obibaziirire aha sokisi eruguru y'amaisho.
- Hunda enyamaishwa ei waakora omu sokisi. Gijwekye akakofira, yejunise akakaada/akapapura nainga akenda kukora omunwa.
- Heereza enyamaishwa egi eiziina kandi oyeshushanirize nk'owaagigambisa. Reetera emireebekyere yaayo yaashesya abantu nainga ogireetere yaanyiiga kurugiirira aha ku orikutambuza omukono gwawe. Gireetere yaatangaara obwo orikutaanuura amaisho gaayo nainga yaaguubwa kubi obwo orikukwatanisa amaisho gaayo hamwe.

Ogundi murimo:

- Kora endijo nyamaishwa kuruga omu sokisi, reero zombi zigambe hamwe. Emitwarize yaazo eri eta? Nizikunda kukora ki? Shemeza ab'eka yaawe obwe orikubakorerayo omworeko gw'enyamaishwa ezikozirwe omuri sokisi.



Emyaka: Puraimare

Obuhwezi bw'omuntu omukuru nainga mukuru w'omwana: Buringaneire

Ebi oraayege (okumanya): Okuteera ebishushani, okugaaniira, okwetegyereza orurimi

Ebi oraate omu nkora (emyoga): Okukorera hamwe/okukoresa ebicweka by'omubiri, okuhangahanga, okukoresa ebiriho ebirikureebuka nk'ebitari kumara reero okareetera byamara

Emiringo y'okukora omurimo:

- Shaba omuntu akuhwere kuhunda enyamaishwa ei waakora omu sokisi

omwesho gw'amabaare nari ogundi gwona ogurimu okubara

Noija kwetenga: Amabaare, ebihimba nari enjuma.

Eby'okukora:

- Ni mizaano ki ey'okubara ei mwine omu ihanga ryanyu? Mwine emizaano yoona ahu otubaare, ebihimba byomire, ekimeeza nainga akabaaho (akarikushushana n'akaayorekwa ahaifo) birikukoresibwa?
- Ogwo muzaano nimuguzaana muta? Noomanya ebiragiro by'gwo muzaano? Waaba otarikubimanya, noobaasa kubona omuntu orikubaasa kubikwegyesa?
- Waaba otaine kabaaho nainga ekimeeza, noobaasa kugira ekiwaateera ahansi ah'eitaka? Noobaasa kutimba otwina tukye ahansi kandi orundaane amabaare g'okukoresa.
- Zaana omuzaano. Gwaba nigwetenga abazaani babiri, noija kwetenga kutunga ou oraazaane nawe. N'enki ekirikugureetera gwaba omuzaano murungi?





Ogundi murimo:

- Noobaasa kuhandiika ebiragiro ebiine kukuratirwa omu kuzaana ogwo muzaano? Yeshushanirize ngu ebyo biragiro nibiija kukoresibwa omuntu otakazaanahoga muzaano ogwo.
- Noobaasa kukora omuzaano musya ogw'okubara. Yegyesa ondijo muntu omuzaano gwawe. Ebiragiro by'ogwo muzaano nibiiha?

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okubara, okwetegyereza orurimi (ebiragiro ebiine kukuratirwa)

Ebi oraate omu nkora (emyoga): Okukwatanisa/enkwatanisa, okurondera ebizibu omubazi, okuhurizana, obukoryo bw'okusinga omuzaano

Emiringo y'okukora omurimo:

- Kyaba kigumire kutunga obuntu obukye, koresa amabaare amahango.

okureeba eby'obuhangwa bw'ensi

Noija kwetenga: Ekaraamu nainga akacumu hamwe n'orupapura

Eby'okukora:

- Shohora aheeru ocwemu eki orikwenda kureeba. Nirubaasa kuba ruri orutangura rurikwombeka nainga emunyu eyekoreire ebyokurya omu kanwa kayo. Nikibaasa kuba kiri ekihuguhugu, ekinyonyi kirikuguruka nainga enjoki erikurundaana omweyangye. Nainga obaasa kureeba emit i n'ebinyimaanyima nari ebiicuucu ebi erikukora obwo erikuzaanira omu muyaga nari oku omushana gurikuteera amaizi g'omu kagyera.
- Reeba oyetegyereze kumara haakiri edakiika 15 nainga okukiraho reero ohandiike ebi waareeba. Reeba ekintu oku kirikutambura, amabara n'erangi (nk'ezirkwakayaka reero zikareetera ekyo kintu kyashugaana kurungi n'ahu kiri). Noobaasa kushoboorora eki waareeba?
- Yebuuze ebindi bibuuzo: Nikingana ki omu buhango? Kiine amaguru angahi? Nikitambura kita? (Nikiiruka, nikitambura mpora, nikitamburira eryo, nikitambuza embabazi.) Nikija nkahi? N'enki ekikiri omumaisho omu mwanya gwakyo, nikiteeraho kukora ki? Hariho obundi bukooko/nyamaishwa eziri nkakyo haihi nakyo? Obukooko obwo/enyamaishwa ezo nibukora ki/nizikora ki?





Ogundi murimo:

- **Teera** ekishushani kirikworeka ebi waareeba.
- **Sherura** bingiho ahabirikukwata aha ki waareeba. Buuza omuntu arikumanya aha bikwatiraine n'eki waareeba, teekateeka aha bibuuzo ebi orikwenda kubuuza. Enyamaishwa egi/akakooko aka neerya ki/nikarya ki? Neetunga eta ebyokuraya byayo/Nikatunga kata ebyokurya byako? Neetuura/nikatuura omu guruupu/n'ezindi/n'obundi nainga neetuura/nikatuura yonka/konka? Neezaara eta/Nikazaara kata? Neefuruka/nikafuruka?
- **Kora akatabo** akarikukwata aha by'obuhangwa bw'ensi. Noobaasa kuhandiika aha rupapura nainga oteere ebishushanu by'ekiwaareeba butoosha. Ku waakubaasa kureeba ekintu kimwe kumara ebiro bingi (nk'ebinyimaanyima/ebiicuucu ebikorwa emit nainga ekirabyo ekiherize kutooka/kurabya nari akagyera, teeraho kwetegyereza empindahinduka eziraabeho omu biro ebyo.



Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, orurimi orukoresibwa kushboorora, sayansi: eby'obuhangwa bw'ensi n'okwetegyereza ebinyamagara.

Ebi oraate omu nkora (emyoga): Okureeba kandi okeetegyereza ebintu, okwega ebikwatiraine n'ebiwaareeba, okugumisiriza, okugumisiriza, okuteekateeka okugyendereire kucencura enhonga kukora encwamu ehikire, okuhurizana.

Emiringo y'okukora omurimo:

- Ku waakuba oine oburemeezi omu kureeba/kuhweza, hurikiriza, kaga nainga okwate ahansi, aha miti n'ebimera ebikwehinguuireize.
- Shboorora ekiwaakaga, ekiwaahurira hamwe n'ekiwaakwataho. Shboororera omuntu ondijo ebiwaakaga, ebiwaahurira n'ebiwaakwataho reero abikuhandiikire.
- Teera ebishushani omu mwanya gw'okuhandiika; nainga oshabe omuntu akuhandiikire ebiwaareeba, ebiwaakaga, ebiwaahurira n'ebiwaakwataho.

Ekyeshongoro kisya, ekidongo kikuru

Noija kwetenga: Tihariho eki orikwetenga kyona

Eby'okukora:

- Teekateeka aha kyeshongoro ekiri omu rurimi rwawe, eki buri omwe arikumanya kandi ekyorobi kweshongora.
- Tamu ebigambo ebyawewe kwonka obwo orikukuratira ekidongo ky'ekyeshongoro ekyo. Noobaasa kukora ekyeshongoro ekirikukwata aha kintu kyona eki orikwetenga, ekyokureeberaho, oku orikubaasa kweza amaino, omuntu/ekintu ari/ekiri omu kitebyo ou/eki orikukirayo kukunda, nainga ekintu ekirikushesya ekibaireho.
- Yegyesa abandi bantu ekyeshongoro kyawewe ekisya. Yongyeramu ebikorwa waaba nooyenda.
- Eki n'ekyokureeberaho ky'ekyeshongoro ekirikukwata aha kunaaba omu ngaro (handwashing) ekiri omu Rungyereza ekirikukuratira ekidongo ky'ekyeshongoro ky'okwendeza omuntu amazaarwa marungi (Happy birthday song). Noobaasa kukyeshongora?
 Wash hands well each day
 To keep germs away
 Scrub with soap and water
 And be on your way

Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, engamba/entambura y'ekidongo/y'ekyeshongoro, engingo/engiga z'ebigambo, ebigambo ebiine amaraka gahikaine/garikushushana (nk'ahamuheru gwabyo)

Ebi oraate omu nkora (emyoga): Okuhurizana, okuhangahanga

Emiringo y'okukora omurimo:

- Waaba otarikuhrira nainga oine obureemezi bwona omu kuhurira, noobaasa kukora ekyeshongoro eky'orurimi orw'obubonero nainga eky'ebikorwa.
- Noobaasa kuteera ekyeshongoro ky'aha reediyo reero ote ebigambo ebyawewe omu kidongo ky'ekyo kyeshongoro.
- Noobaasa kukora ekidongo/engoma obwo orikuteera enyungu na baketi reero mpaho ondijo omuntu ayeshongore.

Ebishoronyo ebitarimu muhoho

Noija kwetenga: Ekaraamu nainga akacumu hamwe n'orupapura

Eby'okukora:

- Reeba aha kishoronyo ky'Orungyereza ekirikwetwa 'ekitarimu muhoho' ekyahimbirwe **Spike Milligan**. Kishomere aha mutima nainga okishome eiraka ryawe rihurirwe waaba nooyenda. Ta omutima aha bigambo ebirikureebeka nk'ebitarimu muhoho nainga ebi waaba otarikuteekateeka/ebyakutangaaza.

On The Ning Nang Nong

On the Ning Nang Nong
 Where the Cows go Bong!
 and the monkeys all say BOO!
 There's a Nong Nang Ning
 Where the trees go Ping!
 And the tea pots jibber jabber joo.
 On the Nong Ning Nang
 All the mice go Clang
 And you just can't catch 'em when they do!
 So its Ning Nang Nong
 Cows go Bong!
 Nong Nang Ning
 Trees go Ping
 Nong Ning Nang
 The mice go Clang
 What a noisy place to belong

- Ku oraaheze kushoma, handiika orukarara rw' **ebigambo byona ebitarimu muhoho** ebi Spike Milligan yaayejuneise omu kishoronzyo eki.
- Ni kigambo ki ekitarimu muhoho ekiwaakirayo kukunda kandi ahabw'enki waakikunda?
- Mwineyo ebishoronzyo ebitarimu muhoho omu ihanga ryanyu/omu rurimi rwanyu?
- Korayo ebigambo oyeshushanirize ngu biriho (n'obu orikumanya ngu tibiriho) ebiraashesye banywani baawe?
- Obwaku obukorwa esheko? Omuringo ogu emit i emihango munonga eshushamu? Eiziina risya eri orikubaasa kuheereza enyindo? Ekintu ekirikushaariira okakyeta ki? Obwaku obu ebigyere byawé birikukora waaba nootamburira aha mababi goomire? Eiziina ry'ekika kisya ky'enyamaishwa?
- Hangaho ebigambo bitaano (05) bisya kandi ohandiike amakuru gaabyo.
- Handiika ebibazo nari sentensi, ekishoronzyo kitarimu muhoho nainga ekitebyo kigufu orikwejunisa ebigambo ebi. Torikwetenga kubyejunisa byona. Tooranamu ebi orikukirayo kukunda hamwe n'ebyo ebiine amaraka nari obwaku gahikaine nainga burikwenda kushushana.
- Noobaasa kwejunisa ekishoronzyo 'On the Ning Nang Nong' kukuteera omuhimbo. Gyezaho kutandika emishororongo nari enyiriri yaawe n'ebigambo nk'ebyo ebiri omu kishoronzyo eki, nka:

↪ Aha ..

↪ Aku ..

↪ Reero ..



Emyaka: 8+

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, amakuru g'ebigambo, entereeza, enkuratanisa nari enkora y'ekibazo nari sentensi, ebigambo ebiine amaraka gahikaine nari garikushushana (nk'ahamuheru gwabyo), hamwe n'engamba nari entambura y'ekishoronyo.

Ebi oraate omu nkora (emyoga): Okuhangahanga, okuhurizana, okukora ebigambo ebiine amakuru

Emiringo y'okukora omurimo:

- Kora ekishoronyo eki n'akanwa nainga oshabe omuntu akikuhandiikire.
- Handiika ekishoronyo ky'emishororongo ebiri (02).

Byara ensigo, embibo nari enjuma reero ogireebe erikukura

Noija kwetenga: Ensigo, embibo nari enjuma, eitaka, amaizi, akati k'okuramba ahu waabywara.

Eby'okukora:

- Toorana eki orikwenda kubyara. Ebihimba, enkoore, obushaza nainga endiijo njuma? Nooyenda kuhinga ekirikuriibwa? Condooza omanyé enjuma ezirkwera gye omu bunaku bw'omwaka obu hamwe n'ebika by'enjuma ebiriho.
- Ronda ahu oraabyare. Omu nyungu nainga omu itaka? Waaba waacwamu kubyara omu itaka, toorana omwanya ahu ebi oraahinge bitaraariibwe nyamaishwa. Condooza omanyé omwanya oguboneire kubyarwamu. N'ogwineho ekiju ekireetaho ekibunda nainga ahu akashana karikuhika?
- Byara enjuma yaawe omu mwanya ogutarimu mwata. Byara enjuma ibiri nainga ishatu omu mwanya gumwe kugira ngu emwe ku yaakubura kutooka nari kumera, ezindi zitooke (zimere)/etooke (emere). Yitiirira ensigo zaawe ekirikumara.
- Ramba ekihingwa kyawe. Handiika eiziina ry'ekihingwa aha kati reero okatsimbe omu itaka haihi n'ahi waabyara enjuma.
- Giitiirire buriizooba nainga emirundi erikumara kwenda ngu itaka rigume ririmu amaizi.

Ogundi murimo:

- Kyebera ensigo/embibo/ekihingwa burizooba kumanya oku eri/kiri-kukura. Pima ekitookire buriizooba kutandika n'eizooba eri kiraaruge omu ita/erikiraatokyereho. Kimazire ebiro bingahi kitakareetsire mababi? Ebirabyo nari ebimuri? Enjuma? Handiika ebi oraareebe.



Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okuhinga ebyokurya, eby'obuhangwa bw'ensi, okureeberera ekimera/ekihingwa

Ebi oraate omu nkora (emyoga): Okureeba okeetegyereza, okurondera ebizibu omubazi

Emiringo y'okukora omurimo:

- Ku oraabe oine oburemeezi omu kutambura, noobaasa kubyara embibo yaawe omu nyungu.
- Noobaasa kuhika ekihingwa kyawe kubaasa kukiitiirira amaizi? Okibyaire omu mwanya ogurikuhikamu omushana?
- Noobaasa kushara munwa gw'ecupa ya purasitiika obyaremu enjuma yaawe.

okushomera hamwe

Noija kwetenga: Ekitabo ky'ebitebyo nainga okorese kimwe aha bitebyo ebiri aha rupapura orurikukurataho.

Eby'okukora:

- Mukuru w'omwana nainga omuntu omukuru naabaasa kumushomera nainga omuto ashomere omukuru. Obwire obumwe, nikibonera mwataana embu, mwembi mukashoma.
- Toorana ekitebyo (kuruga omu kitabo) eki mwembi murikukunda nainga ohangahange ekitebyo ekisya. Eki kibaasa kuba ekyo ekirikuwata aha bintu ebiriho nari ebyabaireho kandi ebya buzima nainga eki oyeteekateekiire.
- Ijuka kuguma noohindura omu iraka ahu kirikwetengyesa waaba nootebya. Okaakora ota eiraka ry'ekicuncu, ery'omugurusu, ery'akame katiinire.
- Waaba nooshoma, obumwe guma oyemerezemu obuuze oti, 'noogira ngu n'enki ekirikuza kukurataho?' Mugyezeho kuteebereza ekirikuza kukurataho hamwe.
- Aha rupapura orurikukurataho hariho ebitebyo bigufu bibiri ebi murikubaasa kushoma hamwe.
- Nimubaasa kushoma ekitebyo kya 'Waruhitsi na Wakame' kuruga omu murimo gw'okuteera ekinyamaishwa eki oyeteekateekiire.' Shoma ekicweka ekikuru eky'ekitebyo, yemereramu kakye otakashomire ekicweka ekirikuhereeruka kandi mugyezeho kuteebereza oku ekitebyo kiraahendere.
- Shoma ekicweka ekirikuhereeruka. Okuteebereza kwanyu kwaba kuhikire? Noobaasa kuhangahanga omutwe gw'ekitebyo?

Ogundi murimo:

- Nimubaasa kukora akazaano ka kimwe aha bitebyo ebi murikukirayo kukunda mwembi? Mucwemu abantu/ebintu abu/ebi-murikwenda kuzaana nkabo nari nkabyo reero mwegyezemu. Muzaanire abandi bantu b'omuka yaanyi ekitebyo eki.

Ekitebyo ky'okubanza (01): Enjojo Tembo:

Nyina Njojo akaguma naagambira omutabani Njojo Tembo ati: 'Otakaaza omu mugyera, harimu kya goonya kihango nikija kukurya.' Tembo akaba naabuuiriza munonga kandi aine ekihika ky'okwenda kumanya bingiho. Goonya ni ki? Baitu tihaine waamugarukiremu ebibuuzo ebi yaabaire aine. N'ahabw'ekyo akagyenda aha mugyera, yaayemeerera aha nkungu yaagwo. Ku yaayeyongyeire haihi n'omugyera yaareeba aha maisho ge hari omu maizi. Ku yaayeyongyeire kwirira haihi, yaareeba goonya yaajumbuka omu maizi eyeshamwaire enshaya zaayo reero omuri ako kaanya...

Goonya ekabakura Tembo yaamukwata enyindo yaagihamya. Tembo akaamuza agumize ati, 'Munyambe!' Nyina akaija naataragaza, yaamukwata omukira. Barumuna ba Tembo hamwe na bakuru be nabo bakaija baateeraho kumwiha omu maino ga goonya obwo barikumunuurira bakwaitse amatu ge, baitu goonya yaaguma emuhamize. Nyina Njojo n'abaana be boona bakateera enduuru reero buri omwe owaabaire ari omu kibira ekyo yaija kubahwera kunyurura Tembo kuruga omu maino ga goonya.

Omuhemu:

Bakamunyuuriirira aha mukira reero gwareeguuka gwaba muraingwa nk'omuguha. Baanyuurira amatu gaaba mahango, n'enyindo nayo baaginyuurira yaaba naingwa. Baanyuurira, baanyuurira, reero aha muheru goonya yaarekura Tembo. Buri omwe ayaabaire naanyuurira akagwera mutaahi we aho omu bunyantsi. Tembo yaahona atyo. Baitu ekyabaire aha kakira ke akaabaire keezingireire, amatu ge amakye, hamwe n'ENYINDO ye!

Egi niyo nshonga ahabw'enki n'okuhisya eriizooba, enjojo ziine ebinyindo biraingwa ebyetwa emyaku hamwe n'amatu mahango agari nk'amababi ga kabegi.

Ekitebyo kya kabiri (2): Amatondo ashatu (03) g'enjura (kikahimbwa Terry Jones):

Eitondo ry'enjura rikaba nirigwa kuruga omu kicu, reero ryagambira eryabaire riri haihi riti: 'Niinye ndikukirayo obuhango n'oburungi omuri eriiguru/omu mwanya owa rukooreera!'

Eitondo erya kabiri ryamugarukamu ritu: 'Nangwa ori eitondo riboneire kandi rirungi; baitu toboneire kunkira ahakuba mbumbirwe kurungi kukukira. 'Om u kuteekateeka okwangye, embumba/emibumbirwe/ endeebeka/enshusha niyo erikworeka oburungi; n'ahabw'ekyo niinye eitondo eririkukirayo oburungi n'okubonera omuri eriiguuru/omu mwanya owa rukooreera.'

Eitondo ery'okubanza ryagarukamu erya kabiri riti: 'Reka tushoboorore kandi tucweho aha nshonga egi omurundi gw'ahamuheru reero empaka ezi nazo zihwe kihanguure.' Ago matondo abiri mpaho gaashaba eitondo rya kashatu kucwamu eririkukirayo okubonera n'oburungi omuri ago abiri. Baitu eitondo rya kashatu ryagambira gari abiri riti: 'Obu ni bushema ki oburi kubagambisa mwembi! Noobaasa kuba ori eitondo rihango, kandi obumbirwe kurungi, baitu, nka buri omwe oku arikukimanya, ekirikukirayo obukuru n'okwera tititi, kandi niinyera kubakira mwembi. N'ahabw'ekyo niinye eitondo eririkukirayo oburungi omuri eriiguru/omu mwanya owa rukooreera!'

Omuhedu: Amatondo gari abiri ku gaabaire gatakarukiremu erya kashatu, gonshatu gaagwa ahansi omu kaina kaijwiremu ebyondo, gaaba ebyondo.

Emyaka: Emyaka yoona

Obuhwezi bw'omuntu omukuru nainga mukuru w'omwana: Bwingi

Ebi oraayege (okumanya): Okwetegyereza orurimi, enkuratanisa y'ekitebyo, okuteebereza/okuteeba, emizaano/ebirikushesya

Ebi oraate omu nkora (emyoga): Okuhangahanga, okukorera hamwe, okukwatanisa/enkwatanisa, okuhurikiriza

Emiringo y'okukora omurimo:

- Noobaasa kutebya ekitebyo omu rurimi orw'obubonero. Ijuka kwejunisa emiringo mingi y'endeebeka y'ahamaisho nk'okukookootsa aha maisho, n'endiijo.
- Muzaane ekitebyo eki murikwejunisa enyamaishwa ezikorwa omu sokisi

omuhiiigo gw'ebirya bitaahi byabyo

Noija kwetenga: Orupapura n'ekaraamu

Eby'okukora:

- Omu muhiigo ogu, noija kusherura ebintu aha rukarara. Noobaasa kuhiiga omunda nainga aheeru y'orwo rukarara. Ku oraahiige n'abandi, oraabanze kutunga ebintu byona eby'aha rukarara niwe araasinge.
- Rabya amaisho omu rukarara. Nikibaasa kukutwarira bwire ki kurundaana ebintu byona ebiri aha rukarara waaba ori wenka nainga oine abandi?

- Ekintu eky'erangi ya bururu
- Ekintu ekyorobi
- Ebintu bibiri ebikozirwe omu biti/mbaaho
- Ekintu ekinuzire
- Ebintu bishatu ebirikutandika n'eniyuguta erikushushana
- Ekintu ekirikwangashana/ekirikwakayaka
- Ekintu ekirikukoresibwa kuboneza
- Ekintu eki orikukunda

- Ku oraabe waahiiga n'ondijo muntu, gyeragyeranisa ebintu ebitarikushushana ebi mwarundaana.
- Hati kora orukarara orwawe. Okwejunisa ebigambo enyongyezi (ekyorobi, ekinuzire, ekirikwakayaka, n'ezindi) hamwe n'erangi nibiija kukuhwera kutandika kurungi. Reeba ebyokureeberaho ebindi ebyayorekwa aharuguru kandi ogyezeho kukora orukarara orwawe orw'ebigambo 10 ebi oine kuhiiga.

- Handiika orukarara rwawe, kandi oshabe ondiijo muntu ahiige ebyo ebiri ahari orwo rukarara.



Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi (enyongyezi n'amaziina g'ebintu), okubara

Ebi oraate omu nkora (emyoga): Okuhangahanga, okurondera ebizibu omubazi, okukwatanisa/enkwatanisa

Emiringo y'okukora omurimo:

- Toorana ebintu kuruga omu kishengye kimwe kyonka ekiri omunju yaanyu.
- Yorekyereza aha bintu ebyo kandi oshabe omuntu abikureetere.
- Gambira omuntu ebintu ebi araakuhandiikire aha rukarara.
- Waaba oine oburemeezi omu kureeba nari kuhweza, noobaasa kushaba ondiijo muntu kurundaana nainga kureeta ebintu kwenda ngu oihemu bibiri-bibiri, reero obishereke omu kishengye kimwe. Obushego bubiri? Ebitabo bibiri? Enkaito ibiri?

Enamba y'ekihama

Noija kwetenga: Ekaraamu nainga akacumu hamwe n'orupapura

Eby'okukora:

Hariho emiringo mingi ei orikubaasa kurabamu kuhandiika enamba yaawe ey'ekihama.

- Noobaasa kuta eshuura/enamba omu mwanya gw'enyuguta y'arifu baitu otandikise enamba/eshuura empango reero ogume nooshuumu kugaruka enyima. Ekyokureeberaho, Orungyereza rwine enyuguta 26. N'ahabw'ekyo, **a=26, b=25, c=24, d=23**, n'ezindi zityo.
Noobaasa kuronda eki egi enamba erikugamba? **8 22 24 9 22 7
24 12 23 22**
- Hoona nabwo noobaasa kuta enyuguta omu mwanya gw'enyuguta ngyenzi yaayo, baitu ozireeke omu buteeka bwazo, ekyokureeberaho, **a=h, b=i, c=j, d=k, e=l, f=m**, n'ezindi zityo.
- Noobaasa n'okukorera buri nyuguta y'arifu akamanyiso kayo, nk'oku kyayorekwa omu kyokureeberaho; yeebuuze ebi:
 - ⌚ Enamba yangye y'ekihama nshemeire kugihandiika kuruga bumosho kutoora omukono ogwa buryo? Nainga kuruga oruguru kushuumu ahansi?
 - ⌚ Nshemeire kugira omubaro gw'obubonero ogurikwingana n'ogw'enyuguta z'arifu omu namba yangye y'ekihama? Nainga obumanyiso bukye oburikujwekyera enyuguta emwe? (eki nikireetera kyagumira abandi bantu kuteeba/kumanya enamba yaawe y'ekihama).
- Noobaasa kukora ebigambo by'orurimi Orungyereza obwo orikukuratira obubonero/obumanyiso obwakuheebwa aha rupapura orw'enyimaho? (ijuka ngu toine enamba y'ekihama yoona omu bwijwire!)

a	b	c	d	e	f	g	h	i	j
r	ø	æ	θ	ɛ	tʃ	ʃ	ɪ	ʊ	ə
k	l	m	n	o	p	q	r	s	
ɔ	≈	ð	ʈ	ø	ɛ	ɳ	ɔ	ɸ	
t	u	v	w	x	y	z			
△	♀	♀	ᵂ	॥	়				

- Kwata akacumu nari ekaraamu n'orupapura. Handiika enamba yaawe y'ekihama omu bwijwire. Handiika obutumwa bw'ekihama, reero orebe haaba hariho orikubaasa kumanya enamba yaawe y'ekihama hamwe n'akakoryo aku waakoresa kigihangaho.

黜 ous ᶻøʃ ֆօֆ

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, okuhandiika, okumanya/okugamba enyuguta eziri omu kigambo/okuhuunisa

Ebi oraate omu nkora (emyoga): Okuhangahanga, okuhurizana, okurondera ebizibu omubazi

Emiringo y'okukora omurimo:

- Ku waakuba oine oburemeezi omu kureeba, noobaasa kwejunisa enamba y'ekihama erikugambwa. Toorana eiraka nka 'ka' nainga 'sha'. Ta eiraka eri enyima ya buri kigambo nainga enyima ya buri ngiga/rugiga/ngingo. Ekyokureeberaho, waagira oti 'I am happy' (nshemerereirwe) omu Rungyereza, kibaasa kuhurirwa nka "kai kam kahap kapy'.

Enshusha/endeebeka hamwe n'entereera (nk'eyemisitaari/okwetoroora) y'ebintu eby'obuhangwa bw'ensi

You will need: Obuti n'amabaare

Eby'okukora:

- Gyenda aheeru/shohora. Nooreeba enshusha/endeebeka/emibumbire hamwe n'entereera z'emiringo engahi omu buhangwa bw'ensi ebikwetoroire? Hoona nabwo reeba ebintu ebirikuruga omu buhangwa bw'ensi ebi mwine omuka yaanyu, nk'ebijuma n'emboga z'ekiiragju.



- Noobaasa kuheereza amaziina angahi g'enshusha/endeebeka/ emibumbire n'entereera? Noobaasa kutunga ekintu:
 - ⊕ Ekiine embaju zirikwingana/zirikushushana
 - ⊕ Ekyebumburikire/ekyezingireire/ekyetoroire
 - ⊕ Ekikozirwe nk'enzi nainga enkurungu?
 - ⊕ Ekirikuguma nikigarukamu emireebekyere/entereera yaakyo emirundi mingi (nk'okwekubamu)?
 - ⊕ Ekikozirwe nk'enyonyozi nainga omutima?

- Oreetegyereize ku amababi gamwe garikushusha nk'otuti tukye? Noobaasa kubona eibabi eririkushusha rityo? Noobaasa kubara obucweka oburi aha mpimbi enkuru ey'ery'ibabi?
- Rundaana obuti n'amabaare. Ni nshusha/ndeebeka ki ezindi ezi orikubaasa kukora obwo orikwejunisa amabaare n'obuti? Noobaasa kukora eky':
 - ⊕ Enshonda/embaju ishatu (03) nainga eky'enshonda/embaju ina (04) ezirikwingana.
 - ⊕ Enshonda/embaju itaano (05),
 - ⊕ Enshonda/embaju mukaaga (06),
 - ⊕ Enshonda/embaju munaana (08)



- Noobaasa kukora ebintu ebiine enshusha/ndeebeka eziine ahantu hashatu: aha maisho (ahatereire), enshonda hamwe n'ahu enshonda zikwatanira? Ekyokureeberaho ky'enshusha eya cuboidi (nk'ey'ekibokisi)? Nainga eya piramidi (nk'ey'aha mutwe gw'enju)?

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Amaziina g'enshusha/ndeebeka y'ebintu, ebigambo ebishoboorora entereera (nk'eyemisitaari/okwetoroora) y'ebintu, okubara

Ebi oraate omu nkora (emyoga): Okuhangahanga, okurondera ebizibu omubazi, okukorera hamwe/okukoresa ebicweka by'omubiri, okureeba okeetegyereza

Emiringo y'okukora omurimo:

- Waaba otaine mwanya gw'aheeru oguri haihi n'enju yaanyu, noobaasa kutambura okaza omu myanya eyehinguurileze/eyetoroire owaanyu?
- Waaba oine oburemeezi omu kutambura, noobaasa kushaba omuntu kukuha orushaniya ruriho ebintu bitari bimwe na bimwe kwenda ngu obyetegyereze reero otooranemu eby'entereera/entereeza ei orikusherura?

Ekitebyo ky'abari omu nyamuziga

Noija kwetenga: Ekaraamu nainga akacumu hamwe n'orupapura

Eby'okukora:

Omurimo ogu noobaasa kugukora n'abandi bantu bashatu nainga abarikukiraho. Mushutame hamwe omu nshusha y'enziga.

- Tandika ekitebyo, ekyokureeberaho, “**Hakaba hariho omwishiki muto kandi mukye owaabaire atarikubaasa kubyama. Akaba ayehindagutuurira omu kitanda kwonka oturo twanga tubura.**”
- Rekyeraaho. Shaba omuntu akuri aha rubaju omu nziga ei mwakora agumizemu n'ekitebyo obwo arikwongyeraho ekibazo/sentensi emwe nainga ibiri/bibiri, ekyokureeberaho: “**Amaisho akaba aguma agahangire okwezi okwabaire kuri nk'ekiziga kihango. Ku yaabaire naareeba okwo kwezi, ahonaaho haagira ekyaruga aha kwezi kyashusha nk'ekiriyo nikimwizira. Gakaba gari amatembezo g'efeeza. Gakaguma nigashuma mpura-mpora gaahika aha dirisa ye.**”
- Ekitibyo kyongyereyo aha muntu arikukurataho ari omu nziga ei mwakora. Ekitibyo eki nimwija kuguma nimukitebya kuheza obwire burikwingana ki? Enziga ei mwakora ku eraabe erimu abantu babiri bonka, muhwerahwerane obwo murikutaana embu.
- Gira ou waashaba kuhendera ekitebyo eki buri omwe ku araahisyé embu/ emirundi ibiri/ebiri arikutebya
- Ebiine kukuratirwa omu kitebyo ky'abari omu nyamuziga n'ebi:
 - ↪ Koresa enteekateeka yaawe nari yeshushanirize; buri kimwe nikibaasika!
 - ↪ Twara ekitebyo omumaisho (otakaagira oti, 'akatemba amatembezo,' reero okarekyeraaho; oschemeire kwongyeraho ebindi, nka 'akainamukira aha matembezo kuhisya obu yaahikire aha mutwe gwago ahu yaareebiire...')
 - ↪ Otamarayo ekitebyo kyona omurundi gumwe, reka omuntu akuri aha rubaju akigumizemu.

- Noobaasa kutoorana ekika ky'ekitebyo kyona. Nikibaasa kuba nikikwata aha kintu ekiriho nainga ekyabaireho (nk'okwemurikira obusinguzi/ okushemererwa nainga orugyendo), nari kirikukwata aha nyamaishwa nainga kiri ekyo eki oyeteekateekiire kuruga omu mutwe gwawe..



Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, enteereza y'ekitebyo n'ebiine kukuratirwa omu kutebya/ebiragiro by'ekitebyo: ebi orikubaasa kukora n'ebi otarikubaasa kukora waheza kutandika kutebya.

Ebi oraate omu nkora (emyoga): Okuteekateeka omu bwira, okuhangahanga, okuhurizana and okukwatanisa/enkwatanisa

Emiringo y'okukora omurimo:

- Kwata obuntu (ebantu ebikye) 10 kuruga omu nju yaanyu obite omu nshaho. Tamu byona ebi oraabone – ekyokureeberaho, ekikopo, eibaare, omwenda, n'ebindi). Guma noiha ekintu kimwe-kimwe omu nshaho. Buri kintu eki oraihe omu nshaho, kyejunise kwongyera ekibazo/sentensi emwe nainga ibiri ensya aha kitebyo kyawé. Ekyokureeberaho, aha mutwe gw'amatembezo, akashangaho ekikopo, ekikopo kya zaabu, kandi eki kikaba nikisheesheka, kirikubooga n'okwituururuka orwizi rwa zaabu..."
- Muhandiike ekitebyo ekirikukirayo oburungi eki mwayehangahangira. Mugaitemu enyongyezi hamwe n'orurimi orurikushoboorora kwenda ngu kyongyere kubonera.

Yebaza emanzi y'omu kyanga kyanyu

Noija kwetenga: Orupapura n'ekaraamu

Eby'okukora:

- Emanzi y'ekyanga kyanyu naabaasa kuba ari omuntu w'obutoosha ohwereire abandi batuuragye nainga ogwo otungire amaani g'okwangisiriza akagumizami n'ebigyendererwa bye n'obu araabe akizire kubugana ebirikumutamba eikono. Buri omwe naabaasa kuba emanzi. Noomanya emanzi yoona omu kyanga kyanyu?
- Teekateeka aha manzi y'ekyanga kyanyu? N'oha, ni muntu ki? Akakora ki? Ahabw'enki orikumwetenga?
- Emanzi yaanyu/yaawe egi nooyenda kugisiima mu muringo ki? Kumuteerera ekishushani, ekipande nainga kumweshongorera ekyeshongoro kirikumuhibisa ahabw'ebyo ebi ahikireho? Ebaruha y'okumwebaza nainga okumuheereza ekihembo eky'ogundi muringo? Nainga obundi nooyenda kumugambira oti 'Yebare' kyonka.
- Tereeza nari kora ekihembo (ekirabo)/handiika ebaruha, reero obone omuringo ogu oraarabyemu ekihembo nari ebaruha kikahika/ekahika emanzi yaawe egi. Shaba omuntu omukuru nainga mukuru waawe akuhwere kuhisia ebaruha/ekihembo aha manzi yaawe.

Emyaka: Puraimare

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza enkura y'orurimi

Ebi oraate omu nkora: Ebikuratirwa omu kuhandiika/ebiragiyo by'okuhandiika, Okuhangahanga, Okugira embabazi n'okweta omu bigyere by'ondijo muntu

Emiringo y'okukoram omurimo ogu:

- Gambira omuntu ondijo akuhandiikire ebaruha orikumugambira ebi orikwendamu. Teera ekishushani eki oraagyohoreze nayo nari gaitaho ekihembo.

okuhiiga eky'omuhendo

Noija kwetenga: Ekaraamu nainga akacumu hamwe n'orupapura

Eby'okukora:

Okuhiiga eky'omuhendo n'omuzaano ahu abazaani barikusherura ebintu ebisherekirwe obwo barikukuratira ebigambo ebi omuntu **yaabarengyeza/ebi yaabaibiraho nari akamanyiso aku baatunga**. Buri kigambo ekibaakurengyeza/ekibaakwibiraho nari akamanyiso aku waatunga niki/nika-kuhisya aha rurengo orurikukurataho okuhisya obu orikutunga eky'omuhendo. Eky'omuhendo eky'aha muheru kandi nikibaasa kuba ekintu kyona eki orikwenda - akantu kakye akaboneire nainga ekyokurya (reebuka ngu enyamaishwa ti yaahika eky'omuhendo eki osherekire).

- Teekateeka aha **muntu ou orikwenda ngu ahiige eky'omuhendo eki osherekire** - murumuna waawe (omuto) nainga mukuru waawe? Omuntu omukuru? Noija kuhandiika eby'okumwibiraho nari eby'okumurengyeza/obumanyiso ebiri/oburi-kuhikaana n'emyaka ye kandi ebi/obu arikubaasa kwetegyereza (reeba ebyokureeberaho eby'ahaifo).
- Teekateeka **ahu oriwenda kukorera omuzaano gw'okuhiiga eky'omuhendo** - omunju nainga aheeru (nari hombi?) Okuhiiga eky'omuhendo nikwija kutandikira nkahi kandi kuhwere nkahi?
- Toorana **emyanya** ahu oraate eby'okurengyeza nari eby'okwibiraho omuzaani kakye (obumanyiso) **omu muzaano gw'okuhiiga eky'omuhendo**. Ebi noobaasa kubita omu muti omuhango, omu kabada y'omunju. Hoona nabwo, eby'okurengyeza/ebi'okwibiraho omuzaani kakye (obumanyiso) bibaasa/bubaasa kuba binwe omuntu ow'omuka endijo otaraayetabe omu muzaano. Emyanya munaana (08) neemara. Handiika emyanya munaana egi nk'oku eshemeire kukuratana.
- Handiika eby'okurengyeza/ebi'okwibiraho omuzaani kakye (obumanyiso) ebya (obwa) buri mwanya aha bupapura butarikushushana. Reebuka ngu eby'okurengyeza/ebi'okwibiraho omuzaani kakye (obumanyiso) nibi/nibu-baasa kwetegyerezibwa abazaani, baitu otabyorobya munonga! Ekyokureeberaho:
 - ⌚ Eby'okurengyeza/ebi'okwibiraho omuzaani kakye (obumanyiso): Nyine omucungwa gunuzire, ekijuma ekiine orukanca (Omwanya: omuti gw'omuyembe)

- ↪ Eky'okurengyeza/eky'okwibiraho omuzaani kakye (akamanyiso): Aha niho orikurootera buri kiro (Omwanya: ekitanda)

Noobaasa kukoresa ebigambo by'encure (ahu orikucurika/kuhindagutura enyuguta ezikora ekigambo), ekyokureeberaho:

- ↪ Eky'okurengyeza/eky'okwibiraho omuzaani kakye (akamanyiso): **KTANA** (Omwanya: Tanka)
- ↪ Nainga obaasa kwejunisa enamba y'ekihama ei waakorera eryo.

- **Heereza eby'okurengyeza/eby'okwibiraho omuzaani kakye (obumanyiso) eshuura**, kandi okube obupapura obw'ebi biriho kugira ngu eshuura nari enamba ebe niyo yaareebeka yonka.
- Noija kuheereza abazaani eky'okurengyeza nari eky'okubaibiraho kakye (akamanyiso) ak'okubanza kandi aka niko karaabahisye ahari ako akarikukurataho, hamwe n'obundi bwona.
- **Guma n'eky'okurengyeza/eky'okubaibiraho kakye (akamanyiso) eky'/ ak'okubanza reero oshereke ebindi/obundi** omu myanya ei waatoorana nk'oku eine kukuratana – yejunise orukarara oru waaba waahandiikire kukuhwera kwijuka ahu oshemeire kushereka eby'okurengyeza/eby'okwibiraho kakye abazaani (obumanyiso). Eky'okurengyeza/eky'okubaibiraho kakye (akamanyiso) ekiri/akari aha shuura/namba y'okubanza niky'o/ nik'oraasherekeho eky'okurengyeza/eky'okubaibiraho kakye (akamanyiso) ekya/ aka kabiri. Eky'okurengyeza/eky'okubaibiraho kakye (akamanyiso) ekiri/akari aha namba ya kabiri niko oraasherekeho eky'okurengyeza/eky'okubaibiraho kakye (akamanyiso) ekya/aka kashatu, reero mpaho omuzaano gukagumizamu omu muringo ogu. Eky'okurengyeza/eky'okubaibiraho kakye (akamanyiso) ekya/ ak'ahamuheru nikyo/niko kaine 'eky'omuhendo.'
- Omuzaano ku guraabe gwine abazaani abarikurenga omwe, aho **mushemeire kwikirizana aha biine kukurwatinwa/ebiragiro by'omuzaano**. Ekyokureeberaho, ebiragiro ebimwe bibaasa kubamu nk'ebi:
 - ↪ Buri omwe ashemeire kurinda mutaahi we atakagiire aha ky'okurengyeza/ eky'okwibiraho abazaani kakye (akamanyiso) ekiri/akari-kukurataho.
 - ↪ Tushemeire kutaana embu kwetegyereza ebi eby'okurengyeza/ eby'okutwibiraho kakye (obumanyiso) biri/buri-kumanyisa.
 - ↪ Tushemeire kubagana eky'omuhendo kuturaakibone.
- **Heereza eky'okurengyeza/eky'okwibiraho kakye abazaani (akamanyiso) eky'/ ak'okubanza**. Gyenda/tambura n'omuzaani/n'abazaani kwenda ngu okaabahwera kwetegyereza eby'okurengyeza/eby'okubaibiraho kakye (obumanyiso) ku baakuremwa.

Ebibuuzo makumi abiri (20)

Noija kwetenga: Tiharo eki orikwetenga kyona

Eby'okukora:

Omurimo ogu nigubonera haaba hariho abazaani abari ahagati ya babiri na bataano (2-5) kwenda ngu buri omwe atungye omugisha gw'okubuuza ekibuuzo.

- Noobaasa kutoorana omuntu weena ow'omu guruupu kuba niwe yaabanza kubuuza; ekyokureeberaho, noobaasa kutoorana orikukirayo obuto omu guruupu nari ogwo ahereerukire kwemurikira/kukuza amazaarwa ge.
- **Toorana omuntu, omwanya nainga ekintu.** Muteekateeka aha muntu nainga ekintu eki murikwetegyereza kurungi kugira ngu ebibuuzo ebitandikirwaho ebi baraabuuze ebikwatiraine n'ogwo muntu, omwanya nainga ekintu mube nimumanya ebigarukwamu byabyo. Noobaasa kutoorana omuntu okirihiochureire, owaafeire nainga ogwo ow'omu bitebyo. Reebuka ngu waatoorana omuntu, omwanya nainga ekintu eki abantu b'omu guruupu abarikukira obwingi barikumanya.
- Otakaagambira omuntu weena eki waatoorana, b'orekire kubagambira. Reka bateebereze.
- Abandi nibabaasa kubuuza ebibuuzo ebirikwenda ebigarukwamu bya 'Eego' nainga 'Ngaaha.' Tandiika n'ekibuuzo ekirikwenda ebigarukwamu bya 'Eego' nainga 'Ngaaha.' Ekyokureeberaho:
 - ⊕ "N'omuntu?"
 - ⊕ "N'omwanya?"
 - ⊕ "N'ekintu?"
 - ⊕ "Kiriho n'ekya buriho nainga n'eky'oyeteekateekiirwe/n'eky'omu bitebyo kwonka?"
- **Mutaane embu murikubuuza ebibuuzo ebigarukwamu 'Eego' nainga 'Ngaaha.'** Reebuka ngu buri muzaani yaatunga omugisha gw'okubuuza ekibuuzo kimwe, haakiri. Ku haraagire owaabuuza ekibuuzo ekitarikugarukwamu 'Eego' nainga 'Ngaaha,' mushabe akitereeze kwenda



ngu ekigarukwamu kyakyo kibe 'Eego' nainga 'Ngaaha.' Ekyokureeberaho, omuzaani tarikubaasa kubuuza, 'Aine emyaka engahi?' kwonka naabaasa kubuuza, 'Ari ahaiguru y'emyaka makumi ataano (50)?'



- **Buuza ebindi bibuuzo ebirikwetenga ebigarukwamu ebitarimu kwekiikuura omuzaano gwaba nigugyenda omumaisho.**



Otakabuurize bibuuzo bisya, banza oteekateeke aha bibuuzo ebyaherize kubuzibwa. Ekyokureeberaho, haaba hariho owaabuurize aha buhango, iwe buuza aha rangi nainga eky'ekintu kikozirwemu.



- **Muzaane okuhisya obu muraahisye ebibuuzo makumi abiri (20) nainga obu haraagire owaheereza ekigarukwamu ekihikire.** Ebibuuzo mubibare hamwe. Guruupu ku eraahisye ebibuuzo 20 batakateebire omuntu, omwanya nainga ekyo kintu, bagambire ekigarukwamu. Haagira owaakigarukamu/ owaakiteeba mutakahikize bibuuzo 20, omuzaano niguba gwahwa.



- **Oraateebe ekigarukwamu ky'ekibuuzo abe niwe yaakurataho kubuuza.** Haaba hatariho owaateeba omuntu ogwo, omwanya nainga ekintu ekyo, reka weena orikwenda kukurataho akurateho. Reebuka ngu buri omwe yaatunga omugisha kugira eki yaateekateeka. Okuheereza buri omwe orubu rwe nikireetera omuzaano gwayenyigirwamu boona kandi buri omwe yaashemererwa!

Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, emiringo

Ebi oraate omu nkora: Okuhurizana, okuteekateeka okugyendereire kucencura enshonga kukora encwamu ehikire, okurondera ebizibu omubazi

Emiringo y'okukora omurimo:

- Ebibuuzo bikome aha bintu eby'omuringo gumwe, ekyokureeberaho, enyamaishwa, ebyokurya nainga abantu ruranganwa. Gambira abazaani omuringo nari guruupu ei ebibuuzo biraihwemu.
- Muzaanire omu tiimu za babiri-babiri kwenda ngu ababiri bahwerahwerane.
- Yongezayo omuzaano kurenga aha bibuuzo 20 kwenda kwongyeza aha migisha y'okutunga ekigarukwamu ekihikire.
- Ta ebintu 20 eby'omuka aha meeza nainga aha rusaniya. Tooranamu kimwe omu kihama reero abandi bateebereze eki waatoorana.

Ebaruha erikuza ow'omwegeresa waawe

Noija kwetenga: Orupapura n'ekaraamu

Eby'okukora:

- Tunga ekaraamu n'orupapura.
- Teekateeka ebintu ebi orikwenda kugambira omwegeresa waawe. Nooyenda kumugambira eki orikukora omuka? Noobaasa kutamu ebi:
 - ⊕ Ekintu ekikushemeize/ekikubonereire
 - ⊕ Ekintu ekirikushesya ekibaireho
 - ⊕ Ekintu ekibaire kigumire eki okozire
 - ⊕ Ebi oineire ekihika
- Handiika ebaruha, oteho endagiiriro n'ebiro, hamwe n'omukono gwawe.
- Kyaba nikibaasika, yetwarire ebaruha egi ow'omwegeresa ogimweheere? Shaba omuntu omukuru nainga mukuru waawe obuhwezi.

Dear miss Lopez,
 I thryed Tee wictes and i loved it. I + was gummy when me and my mum got tangled up in the swing ball. I also thryed muchs game, and all the different games on it. Some of them are difficult and some of them are really fun!. I'm looking forward to making something out of wood. yours

sincerely

This: 

Ogundi murimo:

- Noobaasa kuhandiika ebaruha erikweshushaniriza egoy ei omwegyesa waawe yaakuhandiikiire arikukugarukamu? Yejunise ebigambo ebi omwegyesa waawe yaakukoreise.
- Noobaasa kuhandiikira omwegyesa waawe ebaruha erikushesya obwo orikushoboorora ahabw'enki otabaasize kukora omurimo ogu akuhaire ngu okorere omuka (hoomu-waaka)? Teekateeka rwekwaso etarimu muhoho, ekyokureeberaho:
 - ↪ "embuzi eraire omurimo ogu nkoreire omuka (hoomu-waaka)".
 - ↪ "omuyaga mwingi munonga ogubaire guriho guhuuhire omurimo ogu nkoreire omuka (hoomu-waaka) gwagutwara".
- Yejunise ekyokureeberaho ky'empandiika y'ebaruha kukuhwera kuhandiikira omwegyesa waawe.

Omwegyesa wangye omukundwa,

Nyaburawe nsaasira ahabw'obutakora omurimo ogu otuhaire ngu tukorere omuka. Ninyefuuza munonga ahabw'okuremwa kukora omurimo ogu kwonka ... (habaireho ki)

Niinyija ... (Noija kukora ki?)

Ninkwendeza ebirungi byonka.

Omukono:



Emyaka: Emyaka yoona

Obuhwezi bw'omuntu omukuru nainga mukuru w'omwana: Bukye

Ebi oraayege (okumanya): Okwetegyereza orurimi, okuhandiika ebaruha, entereeza/enkuratanisa/enkora y'ekibazo/sentensi, okumanya/okugamba enyuguta eziri omu kigambo/okuhuunisa

Ebi oraate omu nkora (emyoga): Okuhangahanga, okweta omu bigyere by'ondijo muntu

Emiringo y'okukora omurimo:

- Gambira omuntu ondijo ebi orikwenda kuta omu baruha reero abikuhandiikire.
- Handiika akabaruha/akahandiiko kakye akarikworeka obutumwa obukuru oburi omu baruha yaawe.
- Teerera omwegyesa waawe ekishushani orikumworeka ebintu ebi orikukora omuka.